

ርኢሰ ኢሰያስ አፍወርቂ፡ ናይብ ምጅልስ ስያዲ ሱዳን ልትከበት



ርኢሰ ኢሰያስ አፍወርቂ፡ ናይብ ምጅልስ ስያዲት ሱዳን ጀነራል ማልክ ዐጋር እንዴ ትከበተ ህድግ ምስሉ።

ናይብ ምጅልስ ስያዲት ሱዳን ጀነራል ማልክ ዐጋር፡ ኤሪትሪያ ደግሽ ሱዳን እብ መባደረት ሱዳንዩን ወሰብ-ሸርከት መንጠቀት ሐል ዳይም እግል ልርከብ ለባተ ንዩት እብ ድግማን ክም ተኣክድ ወእግል ሱዳን እብ ሕሰር-ዛይድ ክም ትርእየ ሸርሐ።

ጀነራል ማልክ ዐጋር እሊ ለሸርሐ ዮም 8 ጁላይ ምን ገጽ-ምሴ እት ቃዐት ደንደን ምስል ርኢሰ ኢሰያስ አፍወርቂ ክም

ትውጅህ እግል ዓማት ኣክባር እተ ሀበዩ ሐብሬ ኣክደ።

ጀነራል ማልክ ዐጋር ምስል ርኢሰ ኢሰያስ አፍወርቂ እተ ወደየ ህድግ፡ እት ሓድረት ሓለት ሱዳን፡ ሐርብ ሱዳን እግል ልብጠር ገብእ ለሀላ መባደራት፡ ክምስልሁ መ ዶር ኤሪትሪያ እት ኣክዶት ዐዳለት ክም ህድግው ወደሐ።

እተ ህድግ ርኢሰ ኢሰያሱ ኤሪትሪያ ምን እት ሱዳን ለሀላ ድግሽ ለመጽአው ሱዳንዩን ክም ላጅኢን እንዴ ኢገብኦ፡ ክም መዋጥኒ ክም ትትከበቶም፡ ሸዑብ ኤሪትሪያ ህዩ እት ኣብያቱም ክም ልትሐደሮም ኣክደ።

“ኤሪትሪያ እምበል ለገብኦ እጅጉኣት፡ ቀደም ሐርብ እግል ሱዳንዩን ሐው ሕዱደ ፍትሐተ እህትማም ዐቢ ነህይቡ” ለቤል ጀነራል ማልክ ዐጋር፡ መባጥር ሕኩመት ወሽዑብ ኤሪትሪያ ሐመደ።

እተ ህድግ እብ ጀህት ኤሪትሪያ ወዘር ካርጅየት ኣሰይድ ዑሰማን ሳልሕ፡ ጌምያይ ርኢሰ ኣሰይድ ዮማኔ ገብረኣብ ወሰፈር ኤሪትሪያ እት ሱዳን ኣሰይድ ዒሳ ኣሕመድ ዒሳ፡ እብ ጅህት ሱዳን ህዩ ወኪል ውዛረት ካርጅየት ሱዳን ሰፊር ደፍዐለ ኣልሓጅ ሓድራም ዐለው።

ባጽዕ፡ መርከዝ ተእሂል ምህናት 196 ደረሳይ ኣድሐረ

እት መርከዝ ተእሂል ምህናት ባጽዕ እብ መጃላት ኤለክትሮኒክስ፡ ከህረበት፡ ቴክኖሎጂ ኮምፕዩተር፡ መዲድ ሸበክት ኮምፕዩተር፡ ነጃረት ወሕዳደት እግል 6 ወሬሕ፡ ምን 60 መኣሰሰት ለትፋገረው 196 ደረሰ ትደሐረው።

እተ ዮም 4 ጁላይ ለገብኦት ዓደት መድሐራት፡ መዲርሰ መርከዝ መሀንድሰ ኣረፋይኔ በይን፡ ኮንፈደራልየት ሸቃለ ኤሪትሪያ መቅደረት ኣንፋረ እግል ወቀሎት እንብትቱ ለህሌት በራምጅ፡ ምስል ጠወሮት መቅደረት ኣዳም እንዴ ትመቃርሐ እት ክሉ ድዋራት ወጠን



እግል ልትባጸሕ ልትሸቁ ክም ሀለ እት ሸሬሕ፡ ወራታትለ መርከዝ እግል ኣክዶት ምስል ኩለን መኣሰሳት ወሰብ-ሸርከት ክም ሸቁ ሐበረ።

መስኡል ፈሬዕ ተዕሊም ኣቅሊም ቅብለት ኣብሐር ቀየሕ ኣሰይድ ረሺድ ዑሰማን እብ ጀህቱ፡ ለመርከዝ እግል ምህር ኣካዳምየቶም እንዴ ኣትመመው እት መኣሰሳት ለሸቁ መዋጥኒን ኣምሮም እብ ፍዕል እግል ልሸቀው እቡ ወደየ ለሀላ ሰዳይት ሐመደ።

ወኪሉትለ ደረሰ፡ ለእብ ሸሬሕ ወፍዕል ረክበው ኣምር መቅደራቶም

ክም ወቅል እት ተሐብር፡መፍርየት ክም ገብኦ ኣክደት።

መምቅረሓይ ሸቅል እዳረት ኣቅሊም ቅብለት በሐር ቀየሕ ኣሰይድ ክብሮም ዐንዴምኣኤል እብ እንክፋ፡ እግል ዝያድ ፍገራት ለለትህየብ ተእሂል ክልወክድ እግል ልትደገም ወልትሓየሰ በክት እግል ልትከለቅ ትፋኑ።

ለሓድራም ኩሎም፡ እብ ደረሰ ለፈረ ዕሬ ሕዳደት፡ ነጃረት፡ ኤለክትሮኒክስ ውብዕድ ፈርያቶም ክም ዐፈው ለክበር ወዳሕ።

እተ መናሰበት ቃይድ ቅዋት ጀው ኤሪትሪያ ሚጆር ጀነራል ተኽላይ ሀብቱሰላሴ፡ ናይብ መስኡል ኮንፈደራልየት ሸቃለ ኤሪትሪያ ኣሰይድ ክብረኣብ ኪዳኔ፡ ክምስልሁ መ ርኢሰ መጅልስ ኣቅሊም ቅ/ብ/ቀ ኣሰይድ ኢብራሂም ዐሊ ሼክ ሓድራም ዐለው።

እት ግርበት ሰነት 2017 ርቱብ ኣሸቃሉ ለኣንበተ መርከዝ ተእሂል ምህናት ባጽዕ ኣሰክ እሉ፡ እብ 7 መጃል፡ 299 ኣንሳት ለብእቶም 922 ሸቃለ እድሐር ሀለ።

ሐጋት፡ መናፍዕ መትከምካም ደገጊት መትሐሳር ረክብ

እት ምዲርየት ሐጋት፡ መትከምካም ደገጊት መትከፊያት ከደማት እጅትማዕየት ክም ኣክደ፡ መመቅረሓይ ሸቁል ናይለ እዳረት ኣሰይድ ተኽሌህይማኖት መሳኤል ሐበረ።

እተ ሐልፈየ ሰኖታት ሕዳት፡ ገሌ ክፋል ሰነን እንጨናቅ፡ በጉ፡ ኢዳምር ወግላስ እት እዳረት ደዋይሕ ግላሴ፡ ሰነን እዳረት ደዋይሕ ጎልየ፡ ሸንጌን ወሐሽሻይ እት እዳረት ደዋይሕ ሐሸሻይ፡ ሰነን እዳረት ደዋይሕ ኢዳምር ህዩ ከደማት እጅትማዕየት እተ ረክቦ እተ ኣነን ክም ትከምከመው ለሸርሐ ኣሰይድ ተኽሌህይማኖት፡ እሊ ህዩ ሳድፎም ለዐለ መጋድዕ ከደማት እጅትማዕየት ክም ኣርህዩ ኣፍህመ።

እት ክሉ እዳራት ደዋይሕ ዘመናይ መሸርዕ ማይ ምን ትወጀደ፡ ዝያድ 75 ምእታይት ምን ሰነን ማይ ሲቶ ረክቦ እት ሀለው፡ ዝያድ 85 ምእታይት ህዩ መትከፊዐት ኸዋ ሞባይል እግል ልግበኦ ክም ቀድረው'መ ወደሐ።

እምበል እሊመ፡ ኣሰክለ ድዋራት ለተኣቱ ውጢት ገበይ ረድምየት፡ ናይ ኣወላይት ወምግባይት ደረጃት መዳርሱ ሐቱ ዕያደት ለትትረከብ እቱ 9 መርከዝ ዓፍየት ከደማት ርቱብ ህይብ ክምስል ሀለ ሸርሐ።

እት መዲነት ሐጋት እዳረት ደዋይሕ ኣሸረ፡ ግላሴ፡ ድዋራት ሓሸፌራይ ወደዕሮታይ ለትመደደ ከዋ ከህረበት፡ እት ሰርገል ናይለ ካድም ወመትመዳድ መኣሰሳት ከደማት እጅትማዕየት ዶር ዐቢ ለኣገዴ ክምስል ሀለ ለሸርሐ ኣሰይድ ተኽሌህይማኖት፡ መሸርዕ ማይ ሺተል እግል ልሰኔ'መ ስታት ክምስል ሀለ ወደሐ።

ሰነን ምዲርየት ሐጋት እብ ተራቶም፡ እተ ለትከምከመየ ደገጊት ክጡዋ ከህረበት እግል ልትመደድ ትፋነው።

እት ምዲርየት ሐጋት፡ እት 14 እዳረት ደዋይሕ 48 ድጌ ወዝያድ 65 ኣልፍ ሸዑብ ነብር።

ከበር እሰትሸሃድ

እት ፖሊስ ኤሪትሪያ- መስኡል ፈሬዕ ዳፍየት ጀራይም ገዲም መናድል ኮሎኔል በራኺ ሀይሌ ወልደሚካኤል እብ ዐለ እቱ ሕማም እት ቀበት ዐድ ወካርጅ ልትዓለጅ ሐቀለ ጸንሐ፡ እት ዮም 9 ጁላይ እት 69 ሰነት ዕምሩ ኣሰተሸህደ።

እት ወሬሕ ፌብርዋሪ 1975 እት ቅዋት ተሕረር ሸዕብዩ ለፈግረ ምናድል በራኪ ሀይሌ፡ ቀደም ሕርየት እት ጄሽ ሐርብ፡ ሐቀ ሕርየት ህዩ እት ጄሽ ዕቅበት ሰያደት ወፕሊስ ኤሪትሪያ ኣሰክ ኣምዕል እሰትሸሃዱ እብ ለትፈናተ መስኡልየት እብ ዝያደት በቃዐት ምህነት እግል ሸዕቡ ወወጠኑ እብ መትሰባል ለክድመ መሐርባይ ቱ።

ገዲም መናድል ኮሎኔል በራኺ ሀይሌ፡ በዐል ፈሬዕ ወኣብ 4 ኣጀኒት ቱ።

ዓደት ቀብሩ ህዩ፡ ማሌ-ለህ 10 ጁላይ 2023 ኣልዐስር እት መቅበረት መሐርበት ኣሰመረ ተመ'ት።

ፖሊስ ኤሪትሪያ፡ እብ እሰትሸሃድ ነፈሩ ገዲም መናድል ኮሎኔል በራኺ ሀይሌ ለትሰመዐዩ ሐዘን እት ሸርሕ እግል ዓይለቱ፡ መልህዩም ንዳሉ ወመሻቂቱ ኤማን ወሰብር ለሀበኩም ትብል።



ኩልየት ሐርስ ሐመልማሎ፡ 410 ደረሳህ እብ ዲግሪ ወዲብፕሎም ተኣድሕር



ኩልየት ሐርስ ሐመልማሎ፡ 8 ጁላይ እብ ወዲብ 16ይት ዓዲት መድሐራት፡ 216 ኣዋልድ ለብኡቶም 410 ደረሳህ/ት እብ ዲግሪ ወዲብፕሎም ኣድሐረት።

ዲብሊ ወዚር ሐርስ ኣሰይድ ኣረፋይኔ በርሄ ለልትረኩብ ዲቦም ሰብ ሰልጠት ሕኩመት ወጀብህት ክምሰልሁ ወካይል መክተብ መዝመት ምጅልስ ቅራን ለሐድረወ መድሐራት፡ መትምሳይ ሙዲር ዓም መዕህድ ውቁላት መኣሰሳት ሕኩመት ውብሐስ ዶክተር ሀይሌ ምሕጽን፡ መትድሕረት ዋልዴን ወመደርሲን ናይ ኣሰናይኩም ክሊመት-መክሰቲ ኣሰመዐ።

ዐሚድ ኩልየት ሐርስ ሐመልማሎ ፕሮፌሰር ወልደአምላኽ ኣርአየ እብ ጀህቲ

ዲብ ዐድነ መጃል ሐርስ ኣሳስ እቅትሳድ፡ ክምሰልሁም ዓማት መናበረት ናይ ለበዝሐ ሽዑብ ክምቲ እንዴ ሐበረ፡ ምንላ ኩልየት ለልትደሐሮ ደረሰ፡ ዲብ ለትፈናተ ወራታት ሐርሱ ብሐስ ኣተረዶት እቲይ ሐርሱ ኣደቃብ ርዝቅ ጠቢዐት ወድዋር እንዴ ትዝመው ዶር ሰኒ ወዱ ክም ህለው ኣፍህመ።

ወዚር ሐርስ ኣሰይድ ኣረፋይኔ በርሄ ህዬ፡ እግል መትድሕረት ምሰል ደረጃቶም ለገይሰ ኣምር ወምህነት እንዴ ወሰከው ፍሬ ዐውቴሆም ጃቅፎ ሰበት ህለው ኣሰናይኩም ዲብ ልብል፡ እሊ ላኪን ባብ ኣሰክለ ሽዑብ ወሕኩመት ምኖም ለልትጸበረ ዐማር እንድኢኩን ናይ ደንጎበ ሄራር ክም ኢኮን ኣብረህ።

እትለ ነኡቴ ዲብ ለህሊን መርሐለት፡ ደማነት ነብረ በህለት ምን ኪማእያት ላዴሕ ላቲ እቲይ እግል ኣፍረዮት ክምቲ ለሐበረ ወዚር ኣረፋይኔ፡ ምን ቀደም ክልኡ-ሰነት ወሰር፡ ዲብ ኤራትርየ ሽፍር ጠቢዐት ወመዳፍዐት ባልዲን ወሕማማት እብ ብዝሐ ኣፍረዮት ወወዘዶት፡ ደማነት ነብረ ኣዳም ወንዋይ እግል ኣከዶት ጅህድ ትሩድ ገብእ ክም ህለ ሐበረ።

ወኪለት መትድሕረት እብ ጀህቲ፡ እብላ ደርሰው መጃላት-ዕልም፡ እግል ኣድረሰዮም ሽዑብ ወሕኩመት እብ ዕጹፍ እግል ልፍደው ክምቶም ገለድ በይኣት።

ኩልየት ሐርስ ሐመልማሎ፡ ምን ትትኣሰስ 5,883 ደረሳይ እድሕርት ህሉት።

ለኩልየት፡ እብ መጃላት ብቅል፡ ንዋይ፡ ዓፍዮት ብቅል፡ ሐምሌ ወፍሬታት፡ ሕክምን ሐዋናት፡ ርዝቅ ኣርድ ወድዋር፡ ነብረ ወቴክኖሎጂ ለልትረኩብ እቶም 5 ናይ ዲፕሎም ወ 7 ናይ ዲግሪ በራምጅ ድሩስ እብ ዋጅብ ተህይብ።

ኤራትርየ፡ እት እጅትመዕ ገዝ ለኣለበን ድወል ትሻርክ



ኤራትርየ እት ኣዘርባጃን እት ገብእ ለህለ እጅትመዕ ውዘረእ ገዝ ለኣለበን ድወል ትሻርክ ህሉት።

እትሊ፡ “ውሕደት ወሰባተት እግል ጋብሆት ሐዲስ እድንያይ መታክል” ሐንቴለ ትብል ሰቅራት ለገብእ እጅትመዕ፡ ሳብተት ሳፊረት ኤራትርየ እት መዝመት ምጅልስ ቅራን ሰፊረት ሶፍያ ተሰፋማርያም እቲ ኣሰመዕተ ካሊመት፡ መሰከብት ንዝም ዐለም እግል ኣከዶት፡ ኣንፋርላ ገዝ ኣለበን ድወል ክም ኣር ክፋል፡ እቲ ኣሳሲያም መባድእ ወሲቀት መዝመት ምጅልስ ቅራን ለህለ ኣህዳፍ ሕሽመት ሰያዶት፡ ኢሃጃሞት፡ እት ኢቅደይክ እደይክ ኢላሞሽ፡ መሳሞተን ወሰባተትን እግል ልትዐቀብ ወልትሽቁ እብ ሕበር እግል ልብጠረ ክም ወጅብ ሸርሐት።

መዝመት ገዝ ለኣለበን ድወል ኣሰር መዝመት ምጅልስ ቅራን 2ይት ለዐቢት እድንያይት መኣሰሰት ሰበት ቲ ብዝሐ ለልትሐመድ ንዝም እግል ተኣሰብቅ፡ ኣህዳፍ መሰንዮት ወመትሰዳዳይ እግል ኤተኖት፡ እት ዳፍዶት እድንያይ ክላፋትመ ዶር ዛይድ ክምበ ለወደሐት ሰፊረት ሶፍያ፡ ድወል እድንያይ መሻክሉ እብላ ገበይ እለ እግል ልጋብሃሁ ትላኬት።

እት ዐለምና መታክል ገብእ ለህለ 2ይ ምህም ጋር፡ እት ንዝም እድንዮ ልትረኢ ለህለ ኢመሳሞት ክምሰልቲ እት ወዴሕ ህዬ፡ ክለን ድወል ዐባዩ ወነኣይሽ፡ ክምሰልሁም ናይ እቅትሳድ፡ ሰያሰት፡ እጅትማዕየት ውሰዕድ ፈርግ ለበን ድወል እብ ኢከሰሱ፡ እት ገጽ እድንያይ ቃትን ኣክል-ሕድ ሐቅ ውካለት ክም በን እንዴ ወደሐት፡ ኣሰክ እለ ኣዝመት ለዐለት መዝመት ገዝ ለኣለበን ድወል እትሊ መጃል እሊ እብ ተኣሰትህል እግል ልትሐረክ ለወክድ ኣዜ ክምቲ ወድሐት።

ሰፊረት ሶፍያ እት ደንጎቤ እግል ሰላም፡ መሰከብት ወኣምን መንጠቀት ቀር-ኣፍሪቀ ራብሽ ለህለ መትኣታይ ሕዩል-ካርጅ ክምቲ፡ መበዋር ናይሉ፡ “ሐሽሞት ውሕደት ወሰያዶት ኖስ” ለልብል ምን ኣግደ ኣህዳፍ ገዝ ለኣለበን ድወል፡ እብ ኣር ቅዋቡ ንዝም ህዬ እቲ ሐልፊዮ ዐሰርታት ሰኖታት ምን ኣግደ ሰብብ ደግሸ ወኢመሰከብት ድወል ክም ዐለ እት ተኣክድ፡ እብ ሰበቡ እት ብቅት ኩሩይ ለህለ ሕቁቅ ኣደሚ፡ ሰባተት ገለድን እግል ኣድመኖት ተናዚም ዐለም ለኣተንብህ ክም ህለ ኣፈህመት።

ኤራትርየ እት ሰነት 1995ቱ እትለ 120 ድወል ለትክምክም መዝመት ገዝ ለኣለበን ድወል ለኣቴት።

መህረጃን ኤራትርየን ሰካን ጀርመን እት መዲነት ጊሰን

መህረጃን ኤራትርየን ሰካን ጀርመን፡ ዲብ ዮም 8 ጁላይ እት መዲነት ጊሰን ትከሰተ።

ምን ለትፈናተ መዳይን ጀርመን ውበዕድ ድወል ግዋሬህ ለመጽኣው ኤራትርየን ሻርኮ እቲ ለህለው መህረጃን ሰነት ዮም ዓመት፡ ምን ኤራትርየ ጋይሳም ለህለው ሕካም ኣቃሊም ዝያድ ነያረት ሃይባሙ ክም ህለው ለበጽሐተና ሐብሬ ተኣፍህም።

ኣካም ኣቅሊም ዐንሰበ ሰፊር ዐብደላ ሙሳ፡ እት ኣድር ተዩልል ወጠን፡ በራምጅ ዐማር ወሐዞትለ እት ካርጅ ለነብሮ መዋዋኒን ለኣተንክቤ እብ ኣራእ ወሰኣላት መሻርክት ለትረሸደ ሸፊሕ ርሒብ ሀበ።

እምበል እሊመ፡ በርናምጅ

መሳኒት ኤራትርየ ላቶም ውላድ ጀርመን፡ ክምሰልሁም መድሐራት ናይለ ዲብ ለትፈናተ መራሕል ተዕሊም ለበጽሐው ኤራትርየን ሻርብ ክፋል ናይለ መህረጃን ክም ዐለ ምን ኬን ለበጽሐተና ሐብሬ ተኣክድ።

ናይ ዮም ዓመት መህረጃን፡ በራምጅ ዓዳት፡ ዕፌ ሰወር፡ በርናምጅ እጀኒት፡ ክምሰልሁማ ለመድ ወነባሪ ሙጅተመዕ ኤራትርየ ምሰል መሳኒት ድወል ለቡ ጽበዋ ለሽምል ክምሰል ቲ እመር ህለ።



ኤራትርየን

ክል ኣርቡዕ ለትጠ'በዕ ጀሪደት

መዳልያይ፡

- መሐመድ እድሪስ

ለይኣውት ወኣርተዶት

* ዘህረ ዐሊ

* ፋጥነ ኣድም

ተለፎን፡ 121797/07121322

ፋክስ፡127749፡ ዕ.ሰ.ቡ፡ 247

ተውዝዕ ጀሪደት፡

ተለፎን፡ 200454

ኣትኣመሮት፡

ተለፎን፡ 125013፡ ዕ.ሰ.ቡ፡ 1284

2^ኛ ክፋል

እምክ ኢተአገውኔክ!

አይወ፡ ተዋልል እዲነ ምስል ሕካሙ ልትቃየር። እትለ ዓለምን ዶል ሓክም ዓድል ለአብህዝ ከእግል ዝሉም ለአረቴዕ ወዶልመ ሓክም ዛልም ለአብህዝ እተ ከእግል ስኩብ ወቅሱን ለአገድዕ። እተ ሰኒን ለሀይመ ሕካም አቶብዩ እግለ እት መስኩብት ነብር ለዐለ ገቢል ኤረትርዮ እግል ልዝለሞ ወሐቁ እግል ልንዝዮ ምኑ እግለ እት መስኩብት ነብር ለዐለ ገቢልመ ኢመሐከወ። እማት አቶብዩ መጥ-መጥርለ እማት ኤረትርዮ እት ውላደን እት በክዩ ሳርሓሆም ለዐለዩ፡ ህተንመ ክምስልህን ዐለት ሽንርበን። ወቅት እብ ትሉሉይ ሄራሩ ለአተላሌ ዐለ። አባሪት እምብራጦርት አቶብዩ ምን ደቃም እት መቀርድዕ እንዴ ተዐዲት፡ ምን እምብራጦር ሀይሌሰላሴ፡ እተ ሕረድ ወቅተል ወጨፍጭፍ ለልብል ዐስከርየት ደርግ ትትዐዴ ዐለት። ውጾ ገባይል ኤረትርዮ ወአቶብዩ ሽንርቦም ወግብኦም ለገንሕ ወልርኤ ደዐለ እግሎም። ደረሳይ እግል ኢልትዐለም ውሓግል ተዋልል መናበረቲ እግል ኢልቀይር ወኢልአሰኔ ፍንጌ ክልኤ ሞሻት በሽል ዐለ። ሓለተ ክልኦት ለገቢል እብ ዎርት ፍርድ ምን አፊት እት ፍድግ ትፈረደት። ሽቃላይ ምን ፍሬ ለሀብቱ ትሐረመ። ሐረስታይመ ምን እግል ዘርኦ እብ ባይታሁ አክረረ። ዋልድ ውላዱ ኢለአከ ወእም እብ ሚ ትፈግር እት ውላጃ ምን ሰካብ ላሊ ተሐረመዮ ክልኤ ዕንተ።

ውላደን እግል አብደዮት ሸፈቲት እንዴ ትበህለው አሰክ ኤረትርዮ እንዴ ሳርሓሆም ምን እሳት ትሐፍን እተን ዐለት እማት እቶብዩት። ለበዲር እብ አበው አቶብዩን ለትመሰለት ወትበህለት፡ “አሰክ ቅብለት ለቀንጾ ኢለአቀብል” ክምስል ሾከት ነጋድ እት ደሚረን ቀስ ተአብለን ዐለት። ላመ ሐዳይሰ መጀነዲን ለከረ ማሞ አፊተ ዐለው እቶም ሽዑርም ምን ሽዑረ ሳርሓሆም ለዐለዩ እማቶም ለትፈንተ ደዐለ። እማቶም ምን ፍንቲቶም



አበደድ ማሞ አፊተ ምን አሰር ዲብ ምናድል

ወተብጊሱቶም እግል ወራር እት ልትባከዩ፡ ህቶምም አክለ አመት ወሰድር ምን አርደተ አሕራር ኤረትሪዩን ኬደዋተ፡ ገኖብቶም እብ ፈርሀት ወርዕብ አቅሱስ ገይሰ እተ ምኖም ዐለ። ላመ እግል ዳሩ ወማሉ ልውረሮ መጽአው ለዐለው ገቢል አክለ መቀርጠን ወጅሀቲ አቅመተው ተ፡ ሚ እግል ልሳድፍ ክምስል ቱ ደቁናም እት እንቶም እብ አማውር ሕካምም ለዛልማም ማጽኦ ዐለው።

ማሞ አፊተ እት ሰነት 2023 እት አስመረ ለመጽኦ እቱ ወቅት ህግያሁ እብ ክእኒ አንቡተዮ። “እስልፍ ህግዩ ወሲለት ተፋህም ወመትአማር ወአተረዶት ዕላቃት ተ እግል ኢበል እቀድር። ክምስል መእተዩ እበ እምዬ ዋልዳይቼ ለትትሃጌ እበ ለጸንሐተኒ እግል እትሃጌ አጅዞ እግልዬ። ህተ ህዩ አሮሞ ተ። አሰናይ ደሐን ጸንሐኩም። ሐቆህ እበ እት መድረሰት እንዴ ትለኦት ወእት ሻርዕ እንዴ ፈገርኩ ለተዐለምኩሁ፡ አምሐርኛ ወአዜ ክታብ “አንቱ ከእናቱ” ካትብ እበ ለህሌኮ አምሐርኛ እግል እብለሰ እትክም አዜመ ሰምሐ እግልዬ። ለሳልሳይት ህግያዬ ለእት ንዳል ገቢል ኤረትርዮ እንዴ ተሓበርኩ ለተዐለምኩህ ህግያለ መናድል ገቢል ወእግልዬ እት ሄራር እዲነ ክምስል እሳይር ለወዴተኒ፡ ትግርኛ እበ እግል እድረሰ ወእትፋዘዕ ለቀደርኩ እግል እትሃጌክም አዜመ አጅዞ እግልዬ። እንቋዕ ዳሓን ጸናሕኩም። ህግዩ ትግርኛ እት ንሳልዬ ሰበት ትኩብድ እግለ ልቱት ንሳልዬ ብዞሕ እንዴ ኢተአንተብሆ እግሉ ልብክም ለእብ ክሰሱ ህድግ ለህሌኮ መውደዕ እቱ ክረወ።”

መብህል ማሞ አፊተ ወመባልሱ ለትርድት ቅድረቱ ወለ እግሉ ደርሰ ሰቃፊት ወአደብ፡ ወለ እዱብ አክላቁ ሸርሕ እኩ። ምን እሊ እንዴ ትብገሰው፡ ነድወቱ እግል ልሕደሮ ማጽኦም ለዐለው መሻርኩት እብ ሕሽመት ለአተንሱወ ዐለው። ክምስሊሁመ እግለ እንዴ ጸንሐ ለለአፈግረን ጡዐማት ወለ ለአትሰሕቀ ቃላት እት ለአሰምዐክ ያረቢ ኢተአተአዝመ ወኢተአተክልሱ ትብል።

እንዴ አትለ ህዩ ክምእኒ ቤል፡ “ገቢል ኤረትርዮ ውላዱ ወለ ቃልየት አርወሐቱ ወለ ለእግለ ሕጌ ገብእ ጣህሪት አርደቱ፡ እት ሰቢል ሕርየቱ ቃሊ ወረኪስ ዐውል እግል ልድፊዕ እብ ሐጠር ወስሙድ ቃሊ እስትሸሃድ ደፍዕ እግለ ዐለ ወህለ። ሕነ ህዩ ክምስል አሰሪን

ምስል ሐየት ወአሚን ምስል እሊ ገቢል እሊ እት ክል ጨባብ ተሐኔን ወሐኔ። ለክፍ ጥያራት አባይ ፍዝ እግል ሊዴነ ቀድረ ምስሉ። እግል ሚ እተ ልብል ሰኣል ህዩ፡ ዐውል ሕርየት ወዐውል እለ ቃልየት አርደት፡ አዜመ አሰናይክም ሊህ እንዴ ፊኤክም እት ሐንቱ ጽላል በንዴረትክም ምንዴ አጽለልክም። አሰናይክም አልፍ ዶል። እት ክል በልሸም ዕንታት ወዘዐት ንሳል አሰናይክም” ቤለ ማሞ

አፊተ ሕሙሩግ ሽዑር እቡ እት ልሸዕር። ሽዑር ማሌ ክምስል ዌራይ፡ ወሐሬ ክምስል አሰር እት ሐንቱ ተንዝዞ ጀብህት ሽዑብዮት። ሐቆሃመ ክምስል መናድል ኤረትሪ ወሐዝያይ ሕርየት ወእስትቅላል። እት አድብር ሳሕል፡ ወጋድሞታት በርከ ወመዋቅል ክበሳታት ኤረትርዮ ጀላብለ በዲር እግል ለአብድዩ ለትብገሰ ገቢል ኤረትርዮ እብ ደሙ ወአርወሐቱ እንዴ ትበረዐ ናደለ።

አቤ! እሊ ተዋልል እሊ ህዩ ሽዑርለ እብ ገቢይ አማን ሳሪዩ ኢኮን እግላመ ለዶል እተ ነድወት ሹሩካም ለዐለው ሽዑርም ወአፍካሮም ለሐምርግ ዐለ፡ እምበል ሐሰት።

አይወ! ናይ ሐሰት ሽዑር ኢኮን ለእብ ሐሰት። ል ት ላ ተ ት ንሳሉ። ሳ ድ ቅ ቆ ል ለምን



ል ብ አሚን ተንክር። ሽ ሃ ደ ት ፈታይ ለእት ጨባብ ሓኒ ወሕትይ። ሽዑር በዐል አኪደት ለእት ተልገ ገቢል እንዴ ትከረ እብ እዴ ማኑ ምን ጨባብ ፈግረ፡ ወምን ዓላህ ጭራት ማዩ ጭራይ ለቀርድዐ። ህግዩ እሊ መቃትል እሊ መብህል እግል ልስምዑክ ኢኮን፡ ወመብህል ጋሊ ኢኮን ለምን አፍ ብህላይ ለኢዳሊ ጋሊ። አቤ አማን ለአማኑ ዳሊ።

አቤ፡ በሁሉ አትራዛቅ ኢኮን እግል ልፍተወ እኩ፡ እብ ቃልየት አርወሐቱ ቅማር እንዴ ተልህ ሐቅ ወሐሰት ቀበሊት እንዴ አትጋሰ እብ ኖሱ እግል አማን ለአምኑ ዳሊ። ዕስከሪ ዌራይ ወሐሬ መናድል እት ሰቢል ሐቅ ወአማን መቃትል፡ ማሞ አፊተ። ለአተላሌ፡ “ኣነ እግል ኖሼ በደለ ወልክም አኩ፡ ለእግልዬ እት ጀብህት ቅታል እት ኣነ ለትጸበጠ። አይወ፡ እግልዬ ጸርክ ክሬ ለቤሌኒ ምሔርባይ። ኣነ ምን ክምስል ቱ ደአምር። ላኪን ህለ ህዩ ደእብል እት ሐርብ ሰኒ መክሩህ ሰበት ጸንሐኒ ወእቱ ሐደግክወ። አናመ እት እዴ ሸፍተ እት እወድቅ እበ እት መዐስከርነ እት ሕነ እንሰምዑ ለዐልነ መብህል፡ ሐቅ እት እዴ ሸፍተ ወደቅነ ምለዐል ምድር እንሳይር እንዴ እንቤ ነሐሰብ ደዐል። ዐጃይብ ቱ ህሌኪ ለቤለዩ አርወሐት ልእበ ትገይሰ አለበ” እንተ እተዩ ወሚ ዶል ትጸበጥክ ክምስል አሰር? ምን ትብሉ ህዩ ለበሊስ ክእናቱ።

“እለ ለእተ ትጸበጥኩ መዐረከት እት ተኣነብት ኣነ ናይ አሰተኳሽ ክቡድ አሰለሐት (መሐብራይ) ዐልኮ እት መዲነት ከረን።

ለመዐረከት ክምስል አሰተብዴት ህዩ፡ እብ ጥያረት ሄሊኮፕተር እተ ሳሐተ መዐረከት እት ናሮ መጽኦኩ፡ ወእግል ዐስር ሐቱ አምዕል እበ ህይብቼ ለዐለት ምህመት ሐብሬ ሚርሐት ክቡድ አሰለሐት አትሓረብኩ ወትሓረብኩ። እት ዐስር ሐቱ አምዕልዬ ህዩ እት ገለባይ እግርዬ እብ ጠልገት ትዘበጥኩ። ለለኣትዐጅብቱ አዳም ዮም ጠልገት ዘበጠ ምንዴ ገብእ ወድቅ ሰምዐኩ። እነ እምበል ደም ለእቡ ገርብዬ ጥሉል ለዐለ እብ መጸጸት ኢሸርኩ። በዲር ምስል ምስልዬ ለዐለ መልህዬ ገለድ ኡቱያም ዐልነ። ለጸበጠ ምኒነ አርወሐቱ እግል ልቅተል። ላኪን አምዕልነ ተሐረት፡ አርወሐትነ ኢቀተልነ። ሰለሕክ ክሬ ትበህልነ ወጸርነ ከሬነ። ኮንዶኦ! እዲነ ወሕነ እግል ዲመ አልዳይም ክምስል ትፈናቱነ ልትፈሀመነ ዐለ። ስልሐነ ክምስል ከሬነ ሴርነ ረአሰነ ቀደም እት ገይሶ እብነ ሰድፈት ጥያረት ህተ መጽኦት። ለእግልነ ከቦ ለዐለው መቃትሊን፡ እግልነ ምድር ጽበጦ ቤለውነ። እላመ እክራረት እለ እንቀንጽ ምነ ደእንቤ። ለእግልነ ጸብጣም ለዐለው መቃትሊን ላኪን እግል ዐቂብነ እንዴ ቤለው ምድር ኢጸብጠው። ላመ ጥያረት እተ አካነተ ሐርብ ለክፈት ወእብ አሰረ አቅበለት። ሕናመ ምነ ናይ ደንገበ ምትክራርነ ለእንቤለ እብ ሰላመትነ ቀንጽነ። እብለ ህዩ ሴር እንዴ አጽበጠውነ ጌሰው እብነ። ሕናመ እት እዴህም ክምስል ወደቅነ ሰላም ወአማን ሕነ ኢትጸበርናህን ወሞት ክምስል ኢትሰረነ ትዮቀነ። ኣነ እግል ኖሼ ጃሩሕ ሰበት ዐልኮ አሰክ ሕክምነ ለዐለው እቱ ነሰአውኒ።

መንፈሼ እበ እቱ ውዕል ለዐልኮ ሐርብ ወለ እቱ ዋድቅ ለዐልኩ፡ እዴ አባይ ልእቤሉም ሸፍተ፡ ሰኒ ድዩዕ ጋብእ እቼ ዐለ። ክምስል ጅረሐዬ ትሰፈፈ እግልዬ፡ እንዴ ኢልትአመረኒ፡ ከላሽንዬ ምስልዬ ለዐለት መስለት እቼ፡ ኬን ወእንሰር አንገዋጌነ። ለእግልዬ ትሐክም ለዐለት መቃትለት ሚ ትሐዜ ህሌክ”? ቲለኒ። “ከላሽንዬ ምስልዬ ለዐለት መስለት እቼ” እቤለ። እግል አማን እትሃጌ ሐሰት ይአምረ ወይኔበልሰ ምን ክልቀቼ ተ እለ ህዩ፡ ህታመ እብ ጀሀተ፡ “ከላሽን ሚ እግል ቲዴ እግልካቱ? እንተ ወከላሽን ግድም ትፈናቱኩም እግል ዲመ አልዳይም” ለልብል በሊስ በልሰት እቼ። “አዜ እንዴ ሐሰቡ ሚ እግል ቲበሊኒ ዐለት እግለ መስለክም? “በዳን አዜመ ከላሽን ተሐዜ ህሌክ!? እግል ቲበሊኒ ዐለት እግለ” ወእቤ። እተ በሊስለ አርወሐቱ ሰኒ ትሰሐቀ ወአትሰሐቀ ማሞ አፊተ።

“ሐቆ እሊ፡ ምስለ ምስልነ እግል ልትሰፈፍ ማጽኦም ለዐለው መቃትሊን ምስሉም ትህጃጃክነ። ህቶምም ገሌሆም ምን አዲስ አበባ ክምስል ናደለው ወገሌሆም ምን ክል አርድ ኤረትርዮ እግለ ጃእር ዌራይ እግል ልትሓረቦ ክምስል ትፈረረው ደግመው እግልነ። እግልናመ ለቀደም ገሌ ወቅት ድዶም ንትሓረብ ለዐልነ።



ቀደም ገሌ ወቅት ብዝሓም ምን መልህያሙ እት ቀደም ድፊዕ እብክ ወእበ ምስልክ ድዶም ልትሓረቦ ለዐለው እግል ልሕገል ለቀድረ ለኢትትጸበረ፡ ለኢትትጸበረ ዘዐት ትሰምዕ። አሰናይ ረቢ እብ ሰላም ምን ከልዕ ፋልሕ አፍገሬክም። እንትም እምበል ምራድክም እትሊ ሐርብ እሊ አትያም ክምስል ህሌክም ሕናመ ነአምር” ልብሉነ ዐለው። “ክምስሊሁመ አክለት እንዴ አብሸለው፡ ወሰምስም እንዴ ጸብሐው ሕድርኖት ሰኔት ወደው እግልነ። እሊመ እግልዬ እንዴ የአትፈከሬኒ ኢተርፈ። ክልኤ ቅወት እግል ክልኦት ሀደፍ እት አድሕድ ለኢልትማጽኦ ዌራይ ወውሩር ድድ ሕድ ንትሓረብ ሐቆለ ወዐልነ፡ ሐቆ ሳያታት እት ሐቱ ጢሾ ትዐገልነ ወትከለልነ። ሕነ እበ መብህሉም ሰኒ ትፈክርነ” ቤለ ማሞ አፊተ መትዐጃቡ እበ ፍራስ መቃትሊን ጀብህት ሽዑብዮት ትሐረር ኤረትርዮ ወመዋዲቶም ወሐጠርም ወመትሰባሎም ወለ ህቶም ለኢትጸበረዉ ለትወቀለ በሻለተ አደሶም ለሲያሲ እት ለአትፈክሩ።

ላመ ተአትፈክር እምበል እለ ሚ ኢኮን! እት ንዳል ኤረትርዮ ለኢትደገመት እንዴ ኢኮን፡ ለኢገብኣት ወለኢሳደፊት ላተ ክሉ ረአሱ ይህሌት ወየዐለት። ዌረት ምን መዐደይ ሕዱድ ዐዶም እግል በዳነ ወአሰረቶትነ እንዴ ተዐንደቀው ለመጽኦው፡ ወሕነ ፍዝ ወሕኒ እግል ንግበእ እግለ እለ ቃልየት አርደትነ ዕንዳቄነ እግል ንሰደድ ለትፈረርኩ፡ ሐቆለ ቀበሊት ወዐልነ እተ መዐረከት፡ ሐቆ ገሌ ሳዐታት መቃትል ወዐዶሁ እት ሐቱ ጢሾ ትዐገለው እግል ትሰመዕ ለኢትትጸበሩ አምር-ፈዳብ እንዴ ገብእ ልትአመረከ። በታከት ወሰጥተት መብደእ፡ ዐገል ወአደብ መቃትሊን ክምስል መስል ሰኔት ለልትሸርሐ እቡ ፍንቱይ ጠብዕ መናድሊን ወቅያደቱ ሰኒ ለልኣትፈክረክ ጋር ትሩድ እት እንቱ ዐለ።

አይወ፡ ሸሃደት ሳድቀት ምን ሳፊ ደሚር። በዐል አማን ለእብ ክርንቱ እት ሐቅ ገቢል እብ ክርንቱ ለሻረከ። አይወ፡ እግለ ድዱ ለዐለ ሀደፍ እግል አርወሐቱ ለህብ ሸሃደት ሐቅ ለአሰምዐ፡ በዲር አሰር ወምጅርም ወራር፡ ወሐሬ መቃትል ሳድቅ እት ቆሉ ወፍዕሉ ሀደፋ ምስል ሀደፍ ገቢል ለትዋፈቀ ማሞ አፊተ ወመልሂቱ።

ትተላሌ. . .

(1^ይ ክፋል)

ብሔሥ ሐርስ - ሽክረት ወመቶር ዘበናይ ሐርስ



መጀመሪያ ብሔሥ ሐርስ እት ላቦራቶሪ

ዲብ አግቡይ አቦይ-ክበርይ ለኢትዮጵያ ሐርስ እት ዋወር በሰር ቀደም መትዓዳይ፡ ላዝም እግል ልሕለፍ እቡ ለወጅቡ አሰራል ሀላ። ገሌ ምን እሊ ለኢልትሐልፍ አሰራብ ብሔሥ ወሕፍዝ ቲ። እሊ አግቡይ እሊ ህይ፡ ቀደምለ ተአትሐዜ ፍገሪት ተህይብ እቲ፡ እት አርደት፡ እት ገሮብል ንዋይ ክምሰልሁመ እት ላቦራቶሪ ክምለ ኢትሐዘዮ ቁሪን ለቡ ወቀይ ሰበት ገብእ እቲ፡ ሰብር ለልኢትሐዘዮ ጋር ክም ቲ ልትአመር።

ታሪካይት ከልፍየት ብሔሥ ሐርስ እት ኤረትርፍ

ሐረሰቶት ዐድኅ ምን አዝቡን ቅዱም እንዲ አንበተው፡ ዘርእ ወጂብ ናይ ብቅል ወተዋብ እግል ልርከቦ ናይ ኖሶም ባሰርት አክቤ ዘርእ ወአዳቃል ወዱ ክም ዐለው ወግም ለልትህየቡ ምንማቲ፡ ብሔሥ ሐርስ እብ እሙር ወለትሐፈዝ ንዝም ላኪን ምን መደት ዋልያን ወእንሰር ክም አንበተ ወሳይቅ ታሪክ ወለህለ ኣሳሩ ለአክድ። እት ሰነት 1910 እግል ብሔሥ ለሀደፋ ሐርስ ቡን፡ ፍሬታት፡ ተመር፡ ቀላሚጦቤ፡ እት ፍልፍል፡ ፋጌና፡ ከረን ወወዲ-ወግሪ ክም ተአሰሰ ልትአመር። ምኑ ወሐርመ ዲብ 1920ታት፡ ግዋን ዲብ ቀላቅል ምውዳቅ ጸሓይ፡ ለትሓየሰ ዘርእ ሽንራይ ህይ እት ከበሳታት ክም ትዘረኦ ልትአመር። እምበል እሊ፡

መስተዕምረት ኢጣልያ፡ እት ሰነ ብዙሕ ድዋራት ዐድኑ፡ ምን ብሔሥ ትርበት እንዲ አንበተው አሰክመ እግል ሽቅል ከዛናት ማይ ለገብእ አካናት እት ፈረንጅ ክስኣም ክም ዐለው ወሳይቅ ታሪክ ለሐብር።

እት መደት ፈደሬሽን ህይ፡ ምስል ዲብ አቶብዩ ልትአሰሰ ለዐለ መአሰሳት ብሔሥ፡ እት ኤረትርፍ ዲብ ሰምበል፡ ዳዕሮ-ጳውሎስ፡ ፓራዲዞ ወወዲ-ወግሪ ክም ተአሰሰ ልትአመር። እት መደት ለህ ምን አዝረኡት፡ ሽጌር ወሽንራይ አውለውያት እት ከበሰ ገብእ እት ህለው፡ ምስል ናይ ከረ ኬንዩ CIMMYT ለመሰለ ናይ መንጠቀት መአሰሳት ብሔሥ ዕላቅት ክም አንበተት ሰጃል ለህላቲ።

ሐቆ ፈደሬሽን እት ዐለት መደት መትዓማም ኤረትርፍ እብ አቶብዩ፡ እት ሽበህ ተጠውር ለአርኤ ለዐለ መጃል ሐርስ ኤረትርፍ ደግሮ ዐባይ ትጅሬመ ድኢኮን፡ እት ዐሊ-ግድር ምን አሚሪክ ወእስራኤል ለመጽኦ ጅንሰ አሰል ግዋን ክም ትጅረበ ወ 'Acala 17 17c' ለልትበህል ጅንሰ ክም ጠወረው ምኑ እሙር ሀላ። እብ ተውሳክ፡ እት ሰምበል ወፓራዲዞ'መ እብ ዐደድ ሐድ ዕዛል-አክደር (ግሪን ሃውስ) ወብዕድ ኣላት ብሔሥ ክም ትዋተደ ልትህደግ።

እሊ ክእነ ዲብ እንቲ፡ ጃምዐት አሰመራ'መ እት እምባትከለ ናይ አደንገል፡ ዐተር ወፋሱልየት፡ እት ሐልሐሌ ናይ ፍሬታት ወኣካል፡ እት አበርደእ ህይ ናይ ዐለፍ ንዋይ መራክዝ ብሔሥ እንዲ ቁመ እት ሽቅል ክም ዐለ ወሳይቅ ለልኢክዱ ቲ።

ብሔሥ ሐርስ እት መደት ንዳል ጀብህት ሽዑብየት ተሕሪር ኤረትርፍ ምን ክፍለት 1980ታት እንዲ አንበተት፡ እት ከሰብት ትርበት፡ ኡብሳር ሐርስ፡ ዐቂብ ዓፍየት ብቅል፡ ዕልም-ቃባት፡ እዳረት መሸፈል ንዋይ፡ ማሸኔሪ ሐርስ፡ ክምሰልሁመ እት አንሰሰት ወዓፍየት ንዋይ ለኢትዮጵያ ብሔሥ ሐርስ ትወዴ ክም ዐለት ወሳይቅ ለሐብር።

ብሔሥ ሐርስ ሐቆ ሕርየት መስኡል ወጠንያይት መአሰሰት ብሔሥ ሐርስ አሰይድ ጸጋይ ብርሃኔ፡ እሊ እትለ መደት ገነ እብ 172 አንፋር ለቁመት መአሰሰት፡ ቀደም ሕርየት እብ ለትፈናተ አሸካል ወመራሕል ክም ተዐዳት ወዴሕ። እሊ መአሰሰት እት ሰነት 1996 መቅደረት አዳመ 93 ሌጠ ክም ዐላ፡ ለትወቀለ ዐደድ መቅደረት አዳመ ህይ እት ሰነት 2016 እት ገብእ፡ 195 ባጽሕ ክም ዐለ ለሐብር። አሰይድ ጸጋይ፡ ወጠንያይት መአሰሰት ብሔሥ ሐርስ፡ ምን 1993 አሰክ 1997 እት ዐለ ወክድ፡ ቅስም ብሔሥ ወድሩስ ሐርስ ለትብል ሰሜት እንዲ ነስኦት፡ እት ሐንቴህ ሰለሰ ቅስም በህለት አዝረኡት፡ ዕልም-ቃባት ክምሰልሁመ ቅስም ንዋይ ለልብል አቅሳም እንዲ ሐየበት ትሸቁ ዐለት። ሐቆሁ፡ ምን ሰነት 1997 አሰክ 2003 እት ዐለት መደትመ፡ እት ቅስም ብሔሥ ሐርስ ወጠወርት መቅደረት አዳመ ትጠወረ። ሐቆሁ፡ ፈሬዕ ብሔሥ ሐርስ፡ እብ ብሔሥ ንዋይ፡ ብሔሥ ዕልም-ቃባት፡ ብሔሥ ዕልም ብቅል

ክምሰልሁመ ሀንደሰት ሐርስ ለልትበህል አቅሳም ትትአሰሰ እት ህሌት፡ ፈሬዕ ጠወርት ቅድረት አዳም፡ ውሕደት ተእሂል ውሕደት ጠወርት መቅደረት አዳም ጸብዋ ዐላ።

ምን 2003 ወሐር፡ እሊ መአሰሰት፡ 'ወጠንያይ መዕሀድ ብሔሥ ሐርስ (National Agricultural Research Institute)' እብ ልብል ሽክል ሐዲሱ፡ እሰልፍ እብ አርበዕ ፈሬዕ ቱክኒክ በህለት፡ ፈሬዕ አትሓየሰ ዘርእ፡ ፈሬዕ ብሔሥ ንዋይ፡ ፈሬዕ ብሔሥ እዳረት ጠቢዐታይ ርዝቅ፡ ክምሰልሁመ ፈሬዕ ሀንደሰት ሐርስ፡ ምን ገጽ-ሐር ህይ እት ሰነት 2011 ለእብ ደረጃት ውሕደት ትሸቁ ለዐለት ውሕደት ጄኔቲክስ (ፍዋረት) እት ደረጃት ፈሬዕ፡ እንዲ ትወቀለት እግል ትሸቁ አንበተት። እት ረከሰ እሉም ናይ ቱክኒክ አፍሪዐት፡ ደጉፍ ለልሀይብ ፈሬዕ እዳረት ወማልየት፡ ውሕዳት ባዮ-ቲክኖሎጂ፡ ስታት ወእሕሳእያት፡ ብሔሥ ቲክኖሎጂ ነብረ ውብሔሥ እቅትሳድ መጅተመዕመ ምህማት ክፋላት ናይ እሊ መአሰሰት ክም ገአየ፡ አሰይድ ጸጋይ ብርሃኔ ለአክድ።

እሊ ተሌ ህይ፡ ተቃሪር ናይል አርበዕ አፍሪዐት ቲክኒክ እቲ ለረከዘ ምን መትኣሳሱ አሰክ 2021 ለዐለ ዐባዩ ዐውቴታት ክቲብ ሀላ።

ፈሬዕ አርሃቅ ፍዋረት



አሰይድ ጸጋይ ብርሃኔ

1,664 ምን እሊ ለትከዘን አጅናሰ ብቅል፡ ናይ ጠባዩዕ (agro-morphological) ሕፍዝ ገብእ እት ሀላ፡ እት 200 (ማሽላ)፡ 48 (አደንገል)፡ 8 (ሽጌር)፡ እብ ዓመት እት 256 ሳምንታት (ዐይናት) ህይ፡ ሕፍዝ ጠባዩዕ እብ ዲኤን.ኤ (molecular characterization) ገብእ። ምን ለልትጀመዕ ወልትከዘን ዐይናት፡ እምበል ሕፍዝ ጠባዩዕ፡ እት ወክድ ሕዱድ ሐደሶቶም'መ ሰነ ምህም ሰበት ቲ፡ ምን አካል ውብቁልያት ለክምክም 1,274 ዐይናት ዘርእ ወራታት ሐደሶት ገብእ እቲ። እት ረከሰ-መ፡ እት 686 ሐዲስ ለትጀመዕ ዐይናት እግል ከዘኖት ካፌ ቅያስ ዘርእ ለሀደፋ ኢትዮጵያት ዘርእ ገብእ።

አርሃቅ ፍዋረት ሐዋናት ዐድ አክቦት ወጠወርት ኣሳሰ አርሃቅ ሐዋናት ዐድመ ኣሮት ምህም ርክን ናይ እሊ ፍሮዕ ክምቲ ልትአመር። እብሊ ህይ፡ እሊ



ተመር ወጂብ እብ ብሔሥ

(ጄኔቲክስ) ከዘኖት ናይ ሐርስ አርሃቅ ፍዋረት፡ ኢትሐዘዮቲ ምን ወራታት ቲክኒክ ወኪን ለትሐልፍ መንገፍ ርዝቅ አሰል ደውለት ቲ። እብሊ ቲ ህይ እት ከዘኖት ብቅል፡ ሐዋናት ወዕጪይ እብ ሕሰር ውቁል ወመስኡልየት ለሸቁ።

አርሃቅ ፍዋረት ብቅል ወጠንያይት መአሰሰት ብሔሥ ሐርስ እትሊ መጃል አሰክ እሊ 6,182 ለገብእ ዐይናት አውሳምንላት አዝረኡት (accessions)፡ ናይ 158 አጅናሰ ብቅል ካዝነት ክም ህሌት ልትአመር። ምን እሉም ለ4,557 ምን ቀበት ዐድ ለትጀመዕ እት ገብእ፡ ለተርፈ ህይ፡ እብ ናይ ካርጅ መአሰሳት ወገሌ ድወል ለትህየበው ክምሰል ቶም ተቃሪር ናይል ፈሬዕ ለሐብር። እት

መጃል ወላመ ልሰዕ እት ደረጃት እንበተት ሕፍዝ ለሀላ፡ አሰክ እሊ እት 158 ጅንሰ ናይ በርከ በን ለልትበህል ምን ምዴርያት ገሉጅ ወትሰነይ ለትጀመዕት ሐ እተን አርበዕ ዐዋምል እንዲ ትነፈዐን፡ ናይ ጠባዩዕ (phenotypic characterization) ሕፍዝ ገብእ ዲበን።

አደቃብ አክቦት አርሃቅ ፍዋረት ብቅል ወዕጪይ እት ጠቢዐታይት ኣካኖም (in-situ) ክምሰልሁመ ኢትዮጵያት እት ዘበናይ ከሌብ (ex-situ)፡ አሰሰት ከሌብ አርሃቅ ፍዋረት ሐዋናት ዐድ፡ አደቃብ ሕፍዝ ዓም ጠባዩዕ ናይል ትጀመዕ ዐይናት ብቅል ክምሰልሁመ ወቀሎት ፈሀም መጅተመዕ እትሉም ለትህደገው ጋራት፡ ገሌ ምን ዐባዩ በራምጅ ናይ እሊ ቅስም ክም ቶም ልትአመር።



ብልቱብ ወጂብ -እብ ብሔሥ



ዳዊት የውሃንስ

ለአሲር

ኮሎኔል ግርመ ምን ለዐለ ዲቡ ክልኤ አው ሰለሰ ምስዳር ገጽ ቀደም እንዴ ቀርቡ፡ እብ ሀዳኣት ወሕሽመት ሕልቅሙ እንዴ ሐሰሐሰ። “ውላጄ ወሐውዬ” ከአፎ ህሌኩም?” እት ልብል ህግያሁ አንበተ። እንዴ ኦትሉ፡ “የሙቴ እትለ አካን ንትዋጀህ እት ህሌኑ ፈርሐት ትሰምዐኒ” ሐቀለ ቤሉ፡ እሊ ለተሌ ወዐዝ አሰምዐ።

“ሕነ ዐድኩም ዐረብ ወረው፡ ወንበዴታት ሽዑብ ለሓርዶ፡ ዘምቶ ወቃጭፎ ሰበት ህለው አዳምኩም አድሕኖ፡ እንዴ ትበህልኑ፡ ዐድነ እግል ኢትትወረር እግል ንዳፌዕ፡ ሕሽመተ እግል ኢትትከየድ ህዩ አርወሐትነ እግል ንባሌሕ ወጀላብ ገቢልነ እግል ነኣሰተሽህድ መጽኣኑ። ዲብ አድብር ቅብለት እት ገብኦ ሐርብ አላፍ መልህያምነ ሞተው። ሕነ ህዩ በክትነ እንዴ ሰነ ትጽብዋኑ። ምናተ፡ ሕኩመትነ(ደርግ) ጤልመት እት ኢኩን አሲሪን አለብዬ እት ልብል ጠልሚኑ። እብሊ ህዩ እድንያይት መነዘመት ቀዩሕ መስቀል ክምሰለ ክሎም እት ዐለም ለህለው አሲሪን ሰዳይት እግል ልውዴ እግልነ ኢቀድረ። ምናተ፡ እት ሐንቴ ዕዛል ጀብህት ሽዕብየት እብ ሰላም እንነብር ህሌኑ። ከኡብሊ፡ ትጽብዋኑ እንዴ እንቤ እግል ንህመም አለብኑ። ዲብ ዐስከርየት መትጸባዋ፡ መትጀርሐት ወሞት ለዐለ ወለ ሀላቴ። ሕነ ገድም ጅትድ ጀብህት ሽዕብየት ለበልዐወ ሕበዘት እት እንበሌዕ፡ ህቶም ለለብሰው ድብለት እንዴ ንትከደን አስክለ ገብኣት ትገብኦ እግል ንጽናሕ ቲ።”

አነ ህግያሁ እት እሰሜዕ ጸኣይ ደምቀቼ ትዘብጠኒ ክምሰል ህሌት ሰበት ተአመሬኒ ሽንክት ዕዛል ቀነጸኩ። ኮሎኔል እት ፍንጌ ህግያሁ። “እብ ሐያትክ ነቢር ሰኒቲ። እብ ሐያትክ ሐቆ ነበርክ እኪት ወሰኔት ትርኢ።” ክምሰል ቤለ ጣቅዲት ዳምቀት ወደው እግሉ። ለመስሉል ዴሽ ለዐለ አሲር፡ አክለ ከሊመት በልሰ ለአሲሪን ለአጣቅዖ እግሉ ሰበት ዐለው። አናመ እበ ለዘት ለበ ህግያሁ ትለወቅኩ። ለእጅትመዕ አስክ ተምም ምን ቅብላት አቀምቶም ዐልኩ። እጅትመዕ ክምሰል ተመ ለአሲሪን ዲብ ኮሎኔል እንዴ ቀርበው ሰርም ልስዑሙ፡ ሰርም ልትሳሎሙ ወሰርም ህዩ እዴህ እግል ልጭቀሞ ለሃፍቶ ሰበት ዐለው። አክልኣይ ዐዶም ወአዳሞም ሰፍሉላም ክምሰል ዐለው እብ ቀሊል እግል አምር ቀድርኩ። እግል ግርመ ተሰመ እንዴ ጸብጠት ለመጽኣት መኪነት እግሉ እንዴ ነስኣት ረብረብ እት ተሀርሰ እግል አሲሪን እት ደረባት እንዴ ሐድገቶም ክባባይ ገብኣት።

ለክልኣት መልህያምዬ እንዴ ሐድገውኒ ምን ገይሶ ብዙሕ ወዴኩ። ድንጉር ክምሰል ህሌኮ

እንዴ አመርኮ እብ ሰዐይ አርፒጂ ወወድ-ግርሰን ልባሶም እንዴ ጨፍጨፈው። ገርቦም እንዴ ኢልትሐጸቦ እብ ምሽጥ ጭገሮም እንዴ ለኣነድፎ ጸንሐውኒ። መጦሮም እንዴ ገብኣኮ ልባሽ እንዴ ጨፍጨፍኮ ወነፍሼ እንዴ ተሐጸብኮ ገርብዬ ማይ እንዴ ጸኔ፡ ምሰል ጸርዬ ጀረካነቼ ረፍዐኮ ወአስክ ድፍዐዬ አቅበልኩ።

አሲር ግርመ ተሰመ ለትሃገየ ህግየ ዲብ ሄራር ሐያቼ ክል-ዶል እትፋቀድ። ሰብር ዐውል ክምሰል ህለ እግሉ፡ ዐስከሪ ሐቆ ገብኣክ ብዙሕ ጋራት እግል ልሳድፈክ ክምሰል ቀድር እንዴ አመርኩ። እግል ትክህል ወኤማን እግል ትውዴ ክምሰል ወጅበክ እግል ዴሹ ለዐለው ዐስከር ምህር ሀበዮም። እብ አማን ህዩ ኮሎኔል ግርመ ሐቆ ትጸበጠ ብዙሕ ጋራት አመረ። በርናምጅ ወሀደፍ ጀብህት ሽዕብየት እንዴ ፈሀመ። ጀብህት ሽዕብየት እግል አሲሪን ሐርብ ትወድዮ ለዐለት እንሳንዩት ወመራዐየት እብ ዐመል ክምሰል ረኣ፡ ደርግ ጤልመት እት ኢኩን አሲሪን ሐርብ አለብዬ” እት ልብል ነሽሩ ለዐለ ሕሰይ እግል ፈድሐት ምስዳር እንዴ ነስኣ ክምሰልሁ ላቶም ለዓልያም ዝባዋ እንዴ አፍሀመ። እግል እብ አላፍ ለልትዐለቦ ዲብለ ትፈናተ አካናት ሳሕል ለዐለው። አሲሪን ሐርብ አቶብዩ እንዴ ገይሰ ወተዐቢኣት እንዴ ወዴ እግል ትርኣዩ ለልኣትፈክር ጋር ቲ። እግልዬ ክምሰል ሙናድል እብ አማን ኣትሐበኔኒ።

ኮሎኔል ግርመ ተሰመ እግል አሲሪን እጅትመዕ እንዴ ወዴ ሐቆ ርኤክወ ሰለሰ ሰነት ሐልፈዮ። ቅዋትነ እት መደት ለሃመ እት ወለት-ሸከር ዐለ። እተ መደት ለሀ እት ፍንጌ ጀብህት ሽዕብየት ወንዛም አቶብዩ ህድግ ሰላም ገብኦ ሰበት ዐለ። እምበል እብ ክርን ገቢል ሬድዮታት ዓለምመ እንታቢዕ ዐልኑ። አነ ሬድዮ አምሪክ ታብዖት እፈቲ ሰበት ዐልኩ። ምን ሬድዮ ፈሲለትነ ለትትረኩብ ዲቡ አካናት እትፈንቴ ይዐልኩ።

እንዴ ትደረርነ ወዋርድየት ክምሰል ነድኣነ ንትሃጀክ ማሲያም እንዴ ዐልኩ፡ ሳዐት ሰማን ክምሰል ሐልፈት ውላድ ፈሲለትነ አስክ ክዋናሆም (ተሸኪል) ጌሰው። አነ ህዩ ሳዐት ሬድዮ አሚሪክ አስክ ተምም ዲብ ሐንቴ ደባበቼ እንዴ ገብኣኮ እትጸበር ዐልኩ። አክባር እንሰሚዕ እበ ለዐልነ ሬድዮ 175 ትትበህል ዐለት። እብሊ ሬድዮ ክርን ገቢል ወክርን አሚሪክ እግል ንስመዕ ሐምስ ምትር ለገብኦ ስልክ ምስል አንቴነ እንዴ አትጸበዋኑ እንክራት እንዴ እንቃይር እንሰሚዕ ዐልኩ።

እት ፍንጌለ ደባባትነ ለእንገርሽ ዲቡ ያበል፡ ዐዳይ ወቅሰለ እንዴ ገብኣኩ። ለሬድዮ ዲብ እቀዋቅል

ክርን አሚሪክ እተ ሳዐተ ረከብክው። ለልሙድ ለሐን ወእምቡተት አክባር ሐቀለ ሀበት። እት አርእሰ አክባር ሐልፈት። ለአርእሰለ አክባር ክእነ ልብል ዐለ።

- ናይ አልማንዩ(ጀርመን) ቻንሰለር ሄልመት ኮል በደ እንዴ ልትበህል ዐለ፡ እትለ ሳምን እለ፡ እት ሐቴ ቤት ስተይ እንዴ ልትሻብብ ትረኣ

- እብ ጀብህት ሽዕብየት ጽቡጥ ለዐለ ናይብ ቃእድ ውቃው እዝ ኮሎኔል ግርመ ተሰመ ዲብ ዋሽንግቶን እግል ለልትረከቦ አቶብዩን እጅትመዕ ወደ

ለልብል አክባር ክምሰል ሰምዐኩ። እግል ሬድዮ ምን እዘንዩ እት ገጩ እንዴ አቅረብኮ ገንሐክው። ለሬድዮ ለቴለቲ ሳምዑ ዲብ አነ እግል እመኑ ኢቀደርኩ። እግል ክሉ ለአክባር እንዴ ተአየሰኮ ሰምዐክው። ግርመ እግል እት ነቅፈ እግል አሲሪን ለቤለዩ እት አሚሪካመ (ዋሽንግቶ) ደግመዩ።

“ለአሲር አሚሪክ ጌሰ በህለት ቱ?” መረ ትፈክርኩ። እተ ወቅት ለሀይ እግልዬ፡ ሪም አምሪክ ሳቤዕ ሰመዋት መሰለ እቴ። ተፍኪርዬ ዶል ለሀ ምን አመረ ምን ባጸዕ ወምን ከረን ለልሐልፍ ይዐለ። ተፍኪር ጀብህት ሽዕብየት ላተ ሰኒ ርሒብ ዐለ። እት ሳሕል እንዴ ገብኦ እብ ክሰሳ አምሪክ ለሐሰብ። ሐቀለ አክባር ለሀይ ለሬድዮ ከበር ይሀበት። ሬድዮ እንዴ አቅሰንክወ ጸኣይ ወሬሕ ምንመ ይዐለት ለገባይ አምረ ሰበት ዐልኮ ተከሽ



እት እብል አስክ ክዋናዩ ግሰኩ።

እተ ጽልመት ጅማዐቼ ሳክባም ሰበት ጸንሐውኒ ኢትሃጌክዎም። እንዴ አንጽፍኮ እብ እንቅራርዬ ክምሰል ትለከፍኮ ክሉ ረኣሱ ኢትበለሰኩ። ምድር እግል ኖሰ እንዴ ትቤ ጸብሐት። አሰብሕ ገሌሆም ለጅማዐቼ እት ክርን አሚሪክ ለሰምዐክወ አክባር ደገምኮ



እግሉም። መብዝሐም ክምሰልዩ ትፈክረው። ዎሮት ምኖም ሳኪን ኢፈርሐ። እብ ሐሩቀት ተናን ፈግረ ምኑ። “ማሌ፡ ማሌ አላፍ ዴሽ እንዴ ከምከመ እግል ለአብዴነ ድድነ ልትሓረብ ወለኣትሓርብ ለዐለ ዐስከሪ አባይ ምን ሰጅን ዲብ አሚሪክ! ሚ ሸቅል ቱ እሊ?” እት ልብል ሐሩቀቱ ሸርሐ። ዲብ ለተለዩ ሳምኖታት ኮሎኔል

ግርመ ተሰመ እት ዋሽንግቶን፡ ኒውዮርክ፡ ሳንድዶን ውብዕዳት መዳይን አሚሪክ እንዴ ከልል እግል አቶብዩን እብ ክሰሳ ጀራይም ወጀኣረት ንዛም ደርግ፡ ቴለል ዴሽ ወገቢል አቶብዩ፡ ቴለል ናይለ እት ሐንቴ ጀብህት ሽዕብየት ለህለው አሲሪን ዴሽ አቶብዩ እብሊ ከሰሰ ሰሚናራት ወዴ ክምሰል ዐለ ምን ክርን አሚሪክ እግል እፍሀም ቀደርኩ።



2^ደ-ወናይ ደንበክ ክፈል

ዝክርያት ሙናድላት መርየም ሐጂ ወአምነ ሐሰን


አማን ተ፡ ሐቆ እሊ ላተ ምን አፍባቢት ወድዋራተ አስክ ንዓል ለተንከረየ አዋልድ ሐዳት ኢኮን። እተ ክምሰልሁመ እተ ንዓል ክምለ ናይ በዲር እብ ሐትሐቲ ለፈግረ እንዴ ኢገብኡ። እብ ክምሰል እሊ መጃሚዕ ብዙሕ ዲብ ናድሉ። ሻርከ ወለአስተሸህደ። ሰፍፍ ሰውረት እብ ለትወቀለት መሻረከተን ዓበየ። እሊ ዲብ ሱረት እንርእየ ለህሌነ መጅሙዐት አዋልድመ። አሰር ናይለ ቀደሚህን ለናደለየ ሐዋተን እንዴ ተለየ ናደለየ። አንፋር እሊ መጅሙዐትመ እግለ ግራህን ለናደለየ መሰል ሰኔት እንዴ ገብአየ ክም ዔማት ጀዝብ ዲብለ ንዓል ገብአየ። መሰለን። ለመጃሚዕ አንሳት ብዕድ ምኑ እንዴ ጸንሐኩ። እሊ 14 አዋልድ ለብእተ መጅሙዐት አዋልድ አፍባቢት ነሰኣን ምን ገብኤ። ክል ምንን እተ ንዓል ብዝሓት አዋልድ ወብዝሓም ውላድ ክም እንዴ አፍዘዐየ ለዐንደቀ ተን። እሊ ህዬ። ፍሬለ ንዓል ሽዑብ እት ገብኤ። ህተንመ ለፍሬ ንዓለን ወእስተሸህደን። እሊ የም ሕበር ለዘተ ነአዓውር ለህሌነ ሕርየት ወልደ።

ለወክድ ለሀይ ምን አፍባቢት ምስል ንዓል ለፈግረየ ዝያድ 30 አዋልድ ዐለየ። እሊን እብ ወክድ ወክዱ እት ንዓል ፈግረ ለዐለየ አዋልድ እምበለ ቀደሚህን እብ ሐትሐቲ ፈግረ ለዐለየ። እሊ እት ሱረት እንርእየ ለህሌነ ኣምነ ወመርየም ለብእተ መጅሙዐት ክም ትደረበት። ኩለን አንፋረ ዱቅሪ ሰለሕ እንዴ ተዐንደቀየ። ለብዕዳት ጀላብ እግል ልንዝመ ወለዐንድቀ (በሀለት ጃዝብየት እግል ብዕዳት እግል ልግበኣ) እንዴ ትበህለ እት ቀበትለ ድጌህን ወአዳመን ዲብ አፍባቢት ትወዘዐየ። ሰበት እሊ ለመጅሙዐት እት ዝዋት ወአፍዝየት ሽዑብ ሐዘተን ውቅል ዐለት። ደርበን ለፈግረየ ህዬ ዲብ ድዋራት ወለት ሽከር ወቅጋይ ትደረበየ። ሰበት እሊ እሊ መጅሙዐት እሊ ክልኦት ሀደፍ እቡ ተዐወተት እግል ኒበል እንቀድር። ለአወላይ ሀደፍ ዱቅሪ ጀላብ ሕርየት ሐዘተን እግል ለአገደየ ሰለሕ ረፍዐየ። ወልባስ ንዓል እንዴ ለብለየ። በያን እብ ዐመል ለንዓል ሚ ክም ቱ



መርየም ወአምነ/እት መደትለ ዕንዳቂ

አመረየ ከትበገለየ ወአትበገለየ። ለካልኣይ ሀደፍ ህዬ። እሊን መናድላት እት እማተን እንዴ አቅበለየ ዲብ ሽፍረን ወአፊተን ለህለየ እማተን እግል ለአፍዘዐ ወልንዝመ አንበተየ። መትዐንዳቅ ወናደሎት ሕሽመት ድኢኮን መትሃታር ክም ኢኮን። እሊ ምን ገብኤ አንሳት እግል ልናድለ ወሰለሕ ልርፈዐ በቃዐት ወሒለት አለበን ልብል ለዐለ ቤልሳይ ሐር ፍክር ወሽዑር እግል ልባትከ ከለአፍሽለ ወቅት ኢነሰኣ ምንን። ወለት እግል ትሸቂ። ትናድል። ተአፍህም ወተአድርስ ክም ትቀድርመ እብ ፍዕል አርአየ። እሊ ህዬ ኖሰን እት ንዓል እንዴ አምነየ። እግለ ብዕዳት ክም አትአመነየ ሰመዕ በሲር ቱ። ቀደምለ መደት ለሀ ምን እጅትምዓት ቀይበ ለዐለየ እማት እብሊ ወቀየን እንዴ ትሰጀዐየ እት እጅትምዓት ጀማሂር እግል ልሻርኩ። እብ ደማነት ነፍስ ረአየን ክም ሽርሐ ወለሀይቤ። ለምን ቃብል ልርእያሁ ወፈርህ ምኑ ለዐለየ ጽዋር ወበዋሪድ መናድሊን ምን ቅሩብ እግል ልተማትማሁ ወልድለያሁ ክም ቀድረየ። እሊ ህዬ እብ ፈድለ መጅሙዐት አዋልድ አፍባቢት



ምስል ዲብ ሰነት 1977 ለትበገለት መጅሙዐት ከረ መርየም ወአምነ

እት ቀበት መጅተመዐን ለወደያሁ አትፋዝየት ወፍሬሁ ክም ቱ ኣምነ ሐሰን ተሓኪ። እንሰሓብ ስትራተጂ ክም መጽአመ እሊን አዋልድ ሐር ኢካደደየ። ዝያደት እብ መትሰባል ወበታከት እት ኩሉ ወራታት ሰፍፍ መጀርሒን ወሐጹብ ልባሶም። እት ሰንከት ሴፈ መናድሊን ለገብኤ ቀጨጨት ወግኒ። ክምሰልሁመ እተ ወራታት ተንዚም ለብዕድ እንዴ ትፈረረየ። እግለ እት ድፍዓት እምዐሚዴ ወገምፈሎም ሃግታም ለዐለው መናድሊን እት መወፍት ወእብ ዐቢሁ ህዬ እት አፍሸሎትለ ወራር ዶር ዐቢ ቀደመየ።

ሐቆ እንሰሓብ ህዬ እት ክልኤ እንዴ ትከፈለየ። ገሌህን ዴሽ ድፈዕ ልትወዘዐ ዲብ ህለየ። ለሰረን ህዬ እት እዳረት ሽዑብ ትወዘዐየ። ኣምነ ሀሰን። መርየም



መርየም ሐጂ ወአምነ ሐሰን ማሌ ወየም

ሀጂ ወአምነ ዓፈ እት ጀማሂር ክም ትወዘዐየ። መርየም ሀጂ ዲብ ሀበሮ። ኣምነ ሐሰን እት ናሮ ወአምነ ዓፋ ህዬ ዲብ ለብከ በጽሐየን። እብ ፍንቱይ ለመርየም ሀጂ ትወዘዐት ዲቡ ድዋራት ሀበሮ ምን ናይ

ህዬ። “እሊ ገናዲት። ደባበት እሊ” ወእሉ መስል እት ሎብሎ ቃብብን ዐለው። እሊ እግል ለአፍሽለ ህዬ ለአንፋር ጀማሂር እብሊ እንዴ ኢደንግጸ ወኢልትህደድ። እብ በታከት ኩሉ ለመሻክል እት ጋብሁ። ምስል መጅተመዕ እንዴ ትመሳነየ ወመትማሰለየ። እት ክርፍ እት ለአትየ። ምስል እማት እት ልትሳዐደ ጅን ለአትአዝመ እሊን። ቡን ለአበሽለ። መዋሐን እንዴ አሰፈለየ እግል ደቀ ወለምጪ እት ህለየ። እብ እማት ክም ልትፈተየ ወምሰንየት ክልቀ ልትጸገመ ክም ዐለየ። መርየም ናይ የም ዝክርያታ ቱ።

ኣምናመ እተ መደት ሰልፈ እት ጀማሂር ናሮ ውዝዕት እንዴ ጸንሐት። ሐቆ ፊራሮ ህጁም ምዳድ 1979 እብ ሐዲስ ተውዘዕ ዴሽ መሐሊ ሰበት ትበህለ። ምስል መልህያተ ከረ ፍረወይኒ ገብሬ። ኣምነ ከንቱባይ። ወሰዓድየ መሐመድኖር። እት ወግሬት ናይ ክልኦት ወሬሕ ተድራብ ዐስከሪ እንዴ ነሰአየ። እት ዋግሔ ዲብ ዐለት ውሕደት ዴሽ ሽዕቢ ትወዘዐት። አግደ ሽቅል ናይለ ኣምነ ለትወዘዐት ዲብ ውሕደት ህዬ። ምን ወአስክ ክልፍየት ወግረ ከዋ አባይ አዳም ወመምተለካት አትጋዓዝ ዐለ። ሐቆህ ህዬ ምስል መትአሳስ አቅሳም ተንዚም ምግባይ ምፍጋር ጸሓይ። አስክለ ባካት ትቀየረት። እት ድዋራት እትመት-ዕሚር። ለብከ ወበቀሱ ሐቆሁመ ህዬ አስክ መፋላቅ ዲብ ትትሐረክ። እት ዔለ-ዕሮ ራድዮ እትሳላት ሰልኪ ደርሰት ከአፕሬተር ገብኤት። እብሊ ህዬ ኣምነ ዶል እት ፍርቀት ዓዳት። ዶል ዲብ ራድዮ እትሳል። ወዶልመ ዲብ ድፈዕ እት ኩሉ

አሽቃል ተንዚም ትሸቂ እንዴ ዐለት። ምግባይ ምፍጋር ጸሓይ ለዐለ አዳም ምስል ክም ተሐየብ። እብ ሐዲስ ዲብ ናይ በዲር ሽቅል እት እዳረት ሽዑብ እንዴ አቅበለት። እት መጅሙዐት ገለብ ትወዘዐት። እብሊ ህዬ አስክ ምጽኦት ሕርየት እብ መትሰባል ንዓል ጀለ ሕርየት አተላላ።

ኣምነ ንዓል አንሳት እብ ዕልብ 30 ምእታይት ለዐሌመ ድኢኮን። ወቀየን ምስል ዐለ ጨቅዋ መጅተመዕ ወእስትዕማር ዲብ ልትመጣወር። ዕጹፋት ክም ዐለ ተአሰእል። እብሊ ህዬ ወለት ምን ሽቅል ቤት ወዓበየት አጀኒት ክም ኢትሐልፍ ለሐሰብ ለዐለው ቤልሰት ሐር። እብ ፍዕል መጦር ውላድ ምኖም እንዴ ኢትትፈንቱ እት ሸቂ። ትትሓረብ። ተአስተሸህደ ወትትጃረሕ። ኩሉ ሕፍን ውብርድት ምስል ውላድ ሐወ ትረምቤት ዲቤ።

ሰበት እሊ እተ እስትሸሃድ ጀለ ሕርየት። አንሳይት ኤረትርያመ ክም ክሉ መናድል እስትሸሃድ ቃሊ ደፍዐት። ሰበት እሊ የመቲ ዲብ ምስኩናም ሐርብ ዶል ትገይስ ምስል ውላድ ምስክንት ትጸነሐኩ። እት ሰጅል ሹሀደኣ ምን ትፈትሽመ እተ ክምሰልህ።

እሊ ለወዴሕ እግልነ ህዬ። ምነ እት ሰነት 1976/77 እተ መደት ሰልፍ ሰውረት ለፈግረየ አዋልድ አፍባቢት ወድዋራተ ወአስክመ ምነ እትለ ሱረት ለህለየ ሓርያት መመጅሙዐት ኣምነ ወመርየም። ብዝሓት አስተሸህደየ። መሰለን ምነ ሰልፍ ለፈግረየ ከረ ዐለውየ። ዓሻ ወፍጉረት ለአስተሸህደ ዲብ ህለየ። ምን እሊ እት ሱረት እንርእየ ለህሌነ መጅሙዐት ኣምነ ሐሰን ወመርየም ሐጂ ህዬ። ከረ ኣምነ ዑመር። ራየት ህብቲሱ። ፋጥነ መሐመድ ኖር። ወከዲጃ ሳልሕ አስተሸህደየ። ሰበት እሊ። እሊን ኩለን አዋልድ ምን አሮት ድጌ ፍዘ ጀለ ህርዩኦት ለገብኣያ ተን።

እተ መደት ሰልፍ አዋልድ እት ንዓል ለፈግረየ እቱ አውካድ። ለፋርሰት እምነ ዜነብ ወለት ያሲን ወለተ ዓሽ ንዓል ክም ፈግረት። ኩብድ ዋልዳይት ሰበት ተ ትብጫበጪት። ሐሬመ ሓዋ ወለት ክም ፈግረት። ኣምኒተ ሸዋ እንዴ አበለት ህታመ ምስል ውላድ ሐይሰኒ እንዴ ትቤ እት ንዓል ክም ተሓበረት። ኣምነ ሐሰን ተአፍህም።

ኣምና ሐሰን እትለ መደት ጎነ። መስኡለት ፈሬዕ መሕበር አንሳት አቅሊም ዐንሰበ ትገብኤ እት ህሌት። መርየም ሐጂ ህዬ እት ቅስም መዋሰላት አቅሊም ዐንሰበ ፈሬዕ ርክሰት ወተሳጃል ትሸቂ ህሌት።

“ክት ወራታት ዐማር ሐርስ፡ ተጃሮብ ካፊ ወመቅደረት ራክባም ህኬነ”

መዳሊያይ፡ ዐንዶም ግርማይ (ወድ ደረሰ)
ተርጀመት፡ ሳልሕ ገመ

እት ለሐልፈ ወክድ እት መርከዝ ቅዋት ጀው ፈንቅል ባጼዕ እብ አንፋር ቅዋት ጀው ገብእ ለህለ ወራታት ሐርስ ለክሰስ ጽበጥ ቅዱማም እግልኩም ከምዐልነ ለልትፈቀድቲ። እግል ዮም ህይ ዲብ ብነ ወሐርስ ገብእ ለህለ ወቀይ፡ ሌ/ኮ ሀይሌ ሰረቄ ምን እዳረት ሎጂስቲክ ቅዋት ጀው ለሀቤናቱ ተውዲሕ እዱልያም እኩም ህሌኑ፡ ቅራኣት በኪተት፡

ሐርስ ውበነ ዲብ ተጠውር ደውለት ምን ሕድ ለኢረይሞ መጃላት ቶም። ብነ ብንዩት ትሕትዩት ውበዕድ ሸምል እትህሉ፡ ሐርስ ህይ እግል ክሉ ወራታት ሐርስ ወምሰሉ ለልትጸበጥ አህዳፍ ከምክም። እት መሸሮዕ ዐማር ቅዋት ጀው ፈንቅል፡ “እዳረት ሎጂስቲክያይ ጠለብ ወወጀዶት ኣላት ሐርስ ውበነ” እበ ለትብል ሰሜት ክልኢቱ መጃላት መጥመጦር እት ጨምር ለህለ ወቀይ እግል ንህደግ።

ዐማር ብነ፡
ዐማር ብነ ቅዋት ጀው፡ ብነ፡ መዲድ ዐነድር ማይ፡ ከሀረበት ወማሽኔሪ ለልብል አፍሪዐት እንዴ ከምከማቱ ሸቄ ለሀሌ። ፍሮዕ ብነ፡ ነጃረት፡ ሕዳደት፡ ዘበጥ ቦዶት ወክለ እግል ብነ ለትክሰስ ምህነት ሸቅል ሸምል። እት በቃዐት ሰብ ምህነት እግለ መጃል ለመልኮ እንዴ ትዩመመው ዲቡ ቶም ሸቄ ህለው።

እብ ዐባይ መአሰሳት ለትበነ እት ቀበትለ መዐስከር ለህለ መባኒ ኣትሳናይ ለትሐዝዩ እት ህሉ፡ ውበንዩት ነኣይሸ ኣብያት እት ለኣትሐዜ ዲቡ ወክድ ክሉ እብ መቅደረት ናይ አንፋርም ለአሸቀወ። ጂራን ቅዋት ጀው ለገብአዩ መአሰሳት ሰዳይት እት ለልትሰኣለ ዲቡ ወክድ ህይ፡ ለተኣትሐዜ ሰዳይት ክም ወዱ ሌ/ኮ ሀይሌ አፍሀመ።

አኪደት ናይ እሊ ህይ፡ ክርዮት ኣሳሰ እት ባካት ለልትርኤ ታንክራት ማይ፡ እብ መቅደረት ብነ ቅዋት ጀውቱ ለገብአ። ለሸቅል ክበድ ላኪን እብ ፈድል መትሰባል ወመባደረት አንፋር እት ካቲመቱ እግል ልብጸሕ ቀድረ። ምስል ውዛረት ርዝቅ በሐር እብ መትዓዋንመ ዲብ ሸቅል ብንዩት ለህለ 200 ምትር ጄቲ እት ባካት መባኒ ኮርዩ ዐቢ ዶር ክም አውቀው፡ ገሌ ክም መሰል ለልትነሰእ ወራታት ብነእ ቅዋት ጀው ለሸቀወ ዐባይ አህዳፍ ክምቱ ሌ/ኮ ሀይሌ አፍሀመ።

ፈሬዕ መዲድ ዐነድር ማይ፡ አሸቃል መዲድ ዐነድር ነዲፍ ወርሶሕ ማይ ለክምክም ቱ። እት



ትነሰኣት። ለመሸሮዕ፡ እግል ልግመል እንዴ ትቤ ለኢትሐሰቡ ባዶብ 2.5 ኪሎ ምትር መሸከፊ ውሒዝ እንዴ ትሸቀ እቱ አንበተ። ዲብ ሰልፍ ሰነት 2008 ምን ምንተሐት ዎሮ ሄክታር ለትአንበተ፡ ዲብ ሐድ 60 ሄክታር ትወቀለ።

መንፈዐት ሐርስ እንዴ ተሃንክ ለልትሸረሕ ኢኮን። አንፋር ቅዋት ጀው እንዴ ትገሰው ብላሽ ለልሐልፍ ወክድ አለቦም። እት ድዋራቶም ለህለ እግል ልግመል ለቀድር አርድ ትም እንዴ ቤለው ኢለኣተቃቡሉ። እብ መዓልሻይት ለትአንበተ ወራታት ዐማር አሰክ ለዓል ወተሓትለ ጀዘረት ክምሰልሁመ ተመር ሸቱል ዲቡ ለህለ እብ ለዓል ወተሓት ወድ ድቡዕ ለልትአመር ምድር እርሐባሙ ህለው። እብ ኣሳሰ ሸሬሕ ሌ/ኮ ሀይሌ፡ አሰክ እለ ሸቱል ለህለ ተመር እብ ዐደድ ሐድመ ልግበእ እንዴኢኮን፡ ለሰቱት ለህለ በርናምጅ ምን



ወክድ ዲብ ወክድ እት ልርሕብ ገይሰ ክምህለ አፍሀመ። እብ ኣሳሰ እሊ ዲብ ዐማር ከድሞ ለህለው አንፋር ቅዋት ጀው እግለ ጋድሞታት እምበል መንፈዐት ዲብ በሐር ለኣቱ ለዐለ ውሒዝ ሐሰያት ምፍጋር ጸሓይ እት ተሰትህል መንፈዐት እግል አውዐሎቱ እት ሕሰበት ወፈከሮት ህለው።

ጋድሞታት ምፍጋር ጸሓይ ለሀብካህ ለልትክበት ምድር ርሽድ ቱ። ምን ፈዋክህ እንዴ አሰተብዳክ ለትፈናተ እክልመ ጀርቤ ጋብእ ዲቡቱ። ክሉ እትይ ለሀይብ ክም ህለ ለረከብናህ ሐብሬ ተኣክድ። እብ ኣሳሰ እሊ ህይ፡ በርናምጅ ዐማር ቅዋት ጀው እትሊ ባጽሐ ለህለ እንዴ ኢበጥር፡ ለልትወራረስ እንዴ ገብእ እግል ለኣተላሌ በርናምጅ ጽቡጥ እግሉ ህሉ።

እት ወራታት ዐማር ሐርስ ለትረከበ ተጃርብ ወምህናት ቀሊል ኢኮን። ሎቢን ለኣግደ ፍሬ እትገብእ፡ ምስል ተቅዩር ሓለት ጀው እበ መጽእ መሻክል ዓፍዩት ክም ደወ ልትነፍያቡ ክም ጸንሐው አፍሀመ። ተመርመ ምን ሎቢን እበ ለኢትትፈንቱ ሰእዩት ለልሀይብ



ሌ/ኮ ሀይሌ ሰረቄ
ክሉ ሻብ እለ ወጠን ለወጅሆም ወምሰሉም ለልትዕብ ክል አምዕል በርናምጅ ሸቅል ለረትብ ነፈር ረክበው ምንገብእ፡ ሰቡላም ክምቶም ለአፍሀም። ቅዋት ጀው መሸሮዕ ዐማር ክም አበገሰው ዲብ ሰልፍ አንፋር 16ይት ደውረት ክድመት ወጠን ልትሓበሮ ዲቦም እት ህለው፡ ምን አሰክ እለ ምራድ ሸቅል ለቦም ሰቡላም ወፈዳብያም እብ አደቦም ሕሙዳም ሸባብ እት ልትሓበሮ ዲቦም እብ ሰኔት ሓለት ልሄርሮ ክም ህለው ወደሐ።

እብ መዓልሻይት እብ ዎሮ ሄክታር ለትበገሰት ገግል ጃርዲን ወሸቲል ቅዋት ጀው ፈንቅል፡ 20፡30 ሄክታር እት ትብል ዲብ ሐድ 50 ሄክታር ባጽሐት ህሉት። እትሊ ለትበትርመ ኢኮን። በርበሬ ምን ሄክታር ዝያድ 20 ኩንታል ለልኣቱ እቱ ወክድ ህሉ። እትይ በርበሬ ላኪን እብ ሰብ አርጸት ኬልም፡ እብ ተዋብ ንዋይ እግል ልትበደል በርናምጅ እንዴ ፈግረ ልትሸቂቡ ህሉ።

ዲብ ካምፖ 4 ወ5 እግል ዐማር ሐምሌ ውበዕድ እንዴ ትበህለ ለትዳለ ዝያድ 80 ሄክታር ህሉ። ለሸቅል እግል አሰተብደዮቱ ወራታት ብንዩት ትሕትዩት፡ ማይ ወነዝሞት ዐግምት፡ ክምሰልሁመ ለናይ ጩወ ትርበት እብ ውሒዝ ለትመጽእ ትርበት ወሸፍር እግል ልጽገብ ሰበትብ፡ ዲብ ሸቅል ህለው። ተመር ለፈሬ ዲቡ አርድመ እብ ርሕብናህ ሐድ 80 ሄክታር በጼሕ። ብዕድ እት እንክር ምፍጋር ጸሓይ መዐስከር ቅዋት ጀው ፈንቅል እግል ገግል ተመር እንዴ ትበህለ 40 ሄክታር ምድር ሱዉይ ህሉ። እብ ዕን ገግል ቀሊል ርሕብ ምድር ኢኮን። እሊ ለለርኤነ እግል ዐማር ኣክል አዩ ዕንዱቃም ክም ህለውቱ።

ከመዶራ፡ ጎዕ፡ እክል ወዝረ ለጅንሱ እግል ነብረ ኣሐ ለገብእ ሰዐር፡ ክምሰልሁመ ፍሬ እግል ለሀብ ምን ለኣነብት ሰዮታት እድዉር ለህለ ሎቢን ምን ለልትሐመድ እትይ ለትረከበ ምን ለህለ እብ አውለውየት ለልትረተብቱ። እብሊ እንዴ ትናየተው በርናምጅ ዐማር እበ ለትደቀበት እግል ልክደሞ ዲቡ ክምቶም ሌ/ኮ ሀይሌ ሰረቄ ዲብ ደንጎበ ለአፍሀም።

ሸባብ



ብንዩት ተፍኪር ዐውቲ

ዶ/ር ዐመር ዐስማን

እት አምዕላይ መንበርን እበ እግል ልቀርሮ ለልትአገሞ አው ኢፍሎታይ ፍክርያት ለመለከው አንፋር ሳድፉኑ። እሎም አንፋር እሎም ለበዘሐ ወቅት እብ ገብእ (ወግም) ለከድሞ ወእት ደዋይሎም ለህለው አንፋር ለልትዐየሮ ወግረ ለልሰሐቦ አንፋር ቶም። እሊ ተፍኪር እኩይ አክል-ሕድ ከም ሸፈት ጥልት ቲ።

እግል ምሮ ሰኒ መጃል አው መክሰብ ለልትረከብ ምኑ በርናምጅ ቀደም ለአኑብት ለለአቀሰኖ ወለለአወድቆ ቶም።

እብ ድድ እሊ ለእንርእዩ ምን ለሀሌ፡ ተፍኪር ዐውቲ ውላድ አዳም መባጽሎም እግል ለአግዱ ወልትዐውቶ ተረቲ ዐባይ ቲ። እግል መሰል፡ እብ አንጂ ዚመርማን ሰማን ንቅጠት እግል ጠወሮት አሆታይ ተፍኪር ለልብል ክቲብ ጥቦዕ ዐለ። ከአዜ እለን ምክን እግል ንክሰት ወአሆታይ ፍክር እግል ንጠውር ለሰድያን ንቃጥ እግል ንርኡ ቲ።

1. ብንዩት ተፍኪር

ከም እሊ ጅንሰ በቃዐት ትብኔትን ወሕልምን ዐቢ፡ ወሕዱድ ፍክርን ቅያሰ ለአለቡ እግል ልግበእ ሰዴ። ተጃርብክ ምን ሕኔት እብ ለትዐውትናሁ ወለፈሸልናሁ እንቀይሙ፡ እግል ክሉ እብ ዕን ሰኔት እግል ንርኡዩ ለአቀድረኑ።

እት መንበሮ ሐያት እኩይ ወሰኒ ሓላት ሳድፈኑ። እሊ ህዩ ከም፡ አሰክነ ለልትለከፍ እበን እንዴ ረኤኑ እሊ እግል ደረርን ለትለከፈ ዲብን እበን፡ ቤት እግል ብንዩት ከም ጦብ ንትነፈዕ እቡ። ምን እሊ በሀል ለእንፍህሙ ምን ለሀሌ፡ ክሉ ለሳድፈን እኩይ ሓጃት እብ ዕን እኪት እንዴ ኢገብእ፡ እግል ጸራብን ወአሰነዮትን ለከደም ከም ቲ ነኣምር። እግል ሚ፡ እት ብንዩት ወወሰኑት አሆታይ ተፍኪር ሐቆ ኢህሌኑ፡ ለበጥረ ወለኢሸቄ ምክ ከም ህለ እነ ሸፊሕ ልብል ካርል ድዌክ። ከም እሊ ሐዲሰ አፍካር ለኢወሰክ ምክ ህዩ፡ እት ከጠር ለከፊ ቲ። እግል ኢንዕቤ ወኢንወሰክ ከረዐነ። እት ዓበዮት አሆታይ ተፍኪር ለህለው አንፋር፡ ቅድረቶም እግል ልፈትሾ ወለኣምሮ ሰበት ሰድዮም ምህነቶም ወነፍሶም እት ጠወሮት ተረቲ ውቅል ቲ።

2. ጀርቤ ሐቆ ኢህሌት ዐቡት አለቡ

“ሐት-ሐቲ ዶል ምን ረኣሰ ቅራር እግል ትንጠር ብክ” ትብል ዚመርማን። እሊ በሀል እሊ ሐት-ሐቲ ዶል እግል ሓጃት ምን ልሙድ ናይ ምትዐት ሓለትን እንዴ ፈገርን እግል ንጀርቡ ክም ለአትሐዜ ለአሸር። ክእኒ ወዴነ ምን ገብእ እግል ምክን ምን እት ወርጠት ለከፊ ሸይ፡ ሐዲሰ ፍክር እብ ሻፍገት እግል ለአምጽእ ጀብሩ።

እሊ ህዩ፡ እት ሐዲሰ ደረጃት እግል ንትዐዴ አው ንዕቤ ነፌዕ። እግል ንጀርብ ከጥወት ለእነሰእ ሐቆ ኢገኣኑ፡ እግል ንትዐውት ትብኔት አለብን በሀለት ቲ። ከለጥ እግል ኢልውደው ለፈርሆ አንፋር ስምዐቶም እግል ኢትእኬ ወአዳም ኢልሕመዮም ቲ ለልብህጅ። እንዴ ኢትጀርብ ህዩ ዐውቲ እብ ከአፎ እግል ትምጽእ ቲ ገብእ?

3. ከለጥክ እንዴ ትከብትኩ ሄራርክ አተላላይ

እምተሓን ዶል ትወዴ፡ ምን አክላጥክ ደረሰ ለሐብር። ሐት-ሐቲ ኢነት ሸኪፍ ወሰንደልደል እት ለኢተሐሰበ መናፍዕት እግል ለአብጼሕ ቀድር።

እግልሚ፡ እሊ እግልክ ለሳደፈ ከለጥ ምንላ ለዐልካህ ደረጃት አሰክ ለዐቤት ምዕራፍ ባብ ለከሰት እግል ልግበእ ቀድር። አጥራፍነ እት ክል ወቅት ሚ እግል ንውዴ ወጅብን ዝክርያት ወተፍኪር ለሀይብን ትብል ዚመርማን። ህተ

እሊ ምስል ሽዑርን ለልትጸበጥ ዝክርያት እግል ወቅት ረዩም ዶል ኢነኣንተብህ እሉ ንትዐንቀፍ ወድራሰት እንክሰብ ምኑ ትብል።

4. አኖካይ እግል ዝያድ ትብኔት

ደረጃት ድራሰትን እበ ኢከሰሰ፡ ዕልምን ወቅድረትን ምን ወሰኑት ሐር እግል ነኣቅብል አለብኑ። ጽምእ ዕልም እብላ ገኣት ትግበእ ሓጃት እግል ትርፎ ኢትቀድር።

እሊ ሓዚ ወተዊር አምር እት ክሉ ዕምርን ለኢበጥር ወኢልትከለሰ ቲ። አኖካይ ወትብኔት ምን እት ቀደምክ ለህለ ዐነክል ወኬን ለህለ አሸዩእ ሕቦዕ እግል ቲቲር ወትርኤ ለልአቀድር ጠባዬዕ ቲ። እሊ ህዩ፡ ምክን እት ቅድረት ዕልም እግል ልዕቤ ወአሆታይ ፍክር ንብኔ ሰዴ።


5. ዐውቲ ብዕዳም አንፋር እብ ፈርሐት መትከባት

ናይ ብዕዳም አንፋር ዐውቲ ምን ልብን እብ ፈርሐት መትከባት፡ እግል ምስልን አው እት ደዋዬሕን ሸቄ ለህለው አንፋር ሸረፍ ወእሕትራም ክም ነሀይብ ለአሸር።

እሊ ህዩ፡ አሰክ ብንዩት ተፍኪር ሰኒ ነሰኣኑ፡ ክእኒ ወዴነ ምን ገብእ፡ ፈጅርመ ሕነ ዶል ንትዐውት እሎም አንፋር ምስልን ፈርሐትን እግል ለዐይዶ ነፈዐኑ። ናይ ብዕዳም አንፋር ዐውቲ ምን ልብን እብ ፈርሐት ዶል ኢንትከበት፡ ናይን ናይ መትዐጥት በክት ቲ ተሐት ልትከፊ ለሀሌ።

6. ተፍኪር እኩይ ምኑ እንዴ አዘምኑ ተፍኪር ሰኒ መትመዋን

ለበዝሐ ወቅት ክም አንፋር ለነኣርእዩ አክላቅ ወጠባዬዕ ናይለ እት ደዋዬሕን ለህለው አንፋር ቲ። ጂም ሮህን ክል ነፈር ክም ምግባይ ወግም ፍገራት ናይለ



በዝሐ ወቅቲ ምስሎም ለልሓልፍ ሐምሰ ነፈር እግል ልትሸረሕ ቀድር ልብል።

ዑፋያም ዶል ገብኡቲ ምልእት ዓፍየት ህሌት እልነ እግል ኒበል ለእንቀድር።

እሊ ፍክርን እግል ለበዝሐ ወቅትን ለነሓልፍ ምስሎም አንፋር መሰል በሀለት ቲ። ሰበት እሊ እት አምዕላይ መንበርን እግል ምክን ተፍኪር ሰኒ እቡ ምልኣት ወመትዐጥት ምስል ምን ወቅትን ነሓልፍ መትሓፋዝ ወሰንያም መሳኒት ሕርየት ለአትሐኢኩ። እግልሚ፡ ለሐሰ ምክ ወለሐሰት ሐያት እግል ተህሌ እልኑ፡ ነፍሰን ምስለ ፍክርየት ሰኔት እግል ልመዉን ለቀድሮ አንፋር ንጽመደ።

7. ዑፋይ ምክ ወገሮብ

ለበዝሐ ወቅት ውላድ አዳም እት ዓፍየት ገሮብን ንትእየሱ። ክምስልሁ ምንመ እንገብእ ላኪን፡ ገሮብን ወምክን ክሎም

ገሮብ ትሩድ እት ብኩ፡ ፍክር ሰኒ ለትመለኣ ምክ ሐቆ አለብኩ። ሰኒ ፍገራት እግል ትርከብ ኢትቀድር። ናይ አምዕላይ ወራታትን እብ ዋጅብ ወተኣሰትህል ዲብ ወቅቲ እግል ነኣትምሙ ገኣነ ምን ገብእ ዑፋይ ምክ ወገሮብ ለአትሐኢኩ።

እሎም ክልኣት ክፋላት ገሮን ዑፋያም ወዲሆም እግል ነፍሰን ክም ለኢትከለሰ ጣቀት ወሰዖት ወሀይብ ቲ። እምበል እሊመ ገሮብን ወምክን ዑፋያም ሐቆ ገኣው፡ ሓጃት ሰኒ ናይ አኖካይ ወመትጸባር ንዩትን ትወሰክ። ምን እሊ ለእንርእዩ ምን ተህሌ፡ ክምለ እግል ነፍሰን ነብረ ሰኔት ወርያደት ለተኣትሐዝዩ፡ ምክናመ እብ ትሉሉይ ቅራኣት ወዕልም ወሰኑት ክም ለአትሐዝዩ እግል ንትረሰዕ አለብኩ።

8. ጣቀትን ክል ዶል እግል ንወሰኑ ንጀርብ

ዶል ንትሀኬ ወሸቅል ነኣቤ፡ ለተፍኪር ለእኩይ ባብ እንዴ ረክበ ለኣቲ ክም ህለ ኢንትረሰዕ። ተፍኪር እኩይ እግል ናይ ጣቀት ከዚኢነቲ እት በሕ ለቀይር ቲ።

ሰበት እሊ ክል ዶል ጣቀትን እት መሰለሐትን እግል ነኣውዕለ ክም እሎም ለኢነፍዖ ኢፋሎታይ ተፍኪራት መእተዩ እግል ንፈተሕ እሎም ኢወጅብ። እግል ገሮብን ርያደት ወእግል ምክን ዕልም ወሰኑት ጣቀት ለወሰክ እልነ ወለዐውተን ሰበት ቲ፡ ጽዋርን ንውደዮም።



ደደፍ እብ ምነ ኬን ወእንሰር ለልብሎ አዳም በታተን ለኢሰኣርፍ ሻርዕ ሰንፍሩ ገጹ ተሐት ትደረ። ለበድለቱ ለዐስከርየት ለጸዐደ ላብስ እት እንቱ ምስለ ብጥረቱ ወለ ኢትትወሰፍ ግርመቱ። እሉ ለኢልትወለብ ሐልፋይ ገበይ ይዐለ። እብላሁ እት እንቱ ቤት “ናፈ ወድ ብሻውሮ - ከሪጅ ኩልየት ኹፋ እግል ረስም ወስወር ዶል በጽሐ” እግለ ያፍተት ሰኒ እዩስ እት እንቱ ወክመ እግል ሰልፍ መረቱ ልርእየ ለሀለ እት መሰል። ወዲብለ አፋሁ ሐሊብ መጠቅ ለትመሰል ተበሰም ዋዲ ዲብ እንቱ ተማም ቀርእየ። ከለኦፊት እንዴ ተዐደ። እትለ ጅው፡ ሐሁ ኩሉ ቀልቡ ዲብለ ሽቅሉ ዋዲ ዲብ እንቱ ወእግለ ባኩ ብዙሕ ልብ ካሪ ክም ኢሀለ ዶል ረእዩ። እት ልትሰሐቅ ክም እለ ቤለዩ።

- ሰላም ዐሌክ እንተ ሕሹም ምስውራይ፤

ናፈ እስትቅሩብ እት እንቱ ውልብ ቤለ ዲቡ። ከለማጽእ ሀለ መን ክምቱ ሐቆ ረኡ። እብ ብጣሩ እንዴ ገበኦ ከእት ለኦርሕብ እቡ ክም እለ ቤለዩ።

ደደፍ! አላ! በክት ሰኒ ቱ እሊ፣ መሀሀይ ሚ ትመሰል? ዐድ ህይ ረኤካህም ማሚ? ወለክልኦት ሐው አሕድ ሐቅፈው። ሐቆ እለ ደደፍ ዲብለ ኩርሲ ለፈናን ሀበዩቱ እት ልትገሴ ክም እለ ቤለ።

- አይው፡ ብጥር እቤ ዲቦም ወእግዩ አስከ ሐለፍት። ወጠብዐን ክመ ኢትቀውሃ እለ ቤትክ ለኦካን ለእለ እፈቱተ! ናፈ እብ ክርን ውቅልት እንዴ ትሰሐቅ ወእብ ለውቀት ገጹ እንዴ ፈሰ ከክም እለ ቤለ።

- እከ እብ ርእየትዬ አክል እዩ ፋርሕ ህሌኮ መሰለከ! ወምን ኩሉ ለለኦትዐጅበኒ ጋር ህይ። እከ ለመሰል ዛብጥ እብ ክምሰል እለ ለትመሰል ሃድኦት ወግርም አካን እት ልትአየስ ዶል እርኤ ሰኒ ለኦትፈክረኒ! እለ አካን እለ ምስለ ድፋዓት ወፎርቶታት ቦሲድርዮስ ወፍሺድምስ ሚ ተኦትመሳሰለን!

ደደፍ ክም እለ ቤለ።

- ናፋ፡ ብዙሕ ኢትትፈከር። አነ እብ አማን ዐስከሪ አነ። ምናተ ክመ እብ ሰብ ሽኔ ሐቶ ሻም ለባበት ወመዕረፈት ለጸብጤኒተ ምኑ ለኢልውሕድ ሻም ፈን ወረስም ጸብጥዬ ሀለ።

ናፈ እስትቅሩብ እት እንቱ ለሐወጅቡ ለዐል እንዴ ሳደደዩ ከክም እለ ቤለ።

- እለ ህግያከ ለሰምዕ ላቱ ዌርሳይ ዐራት ናይለ መምለክት እንተ መሰለ። ህቶም መልክ እግል ልግበእ ለኦትዳልዉ እት ህለው ለባበት ወፈን ወሕራበት ለዐሉሙ። እለ ትርድት ሲያሰት እላተ ለእግል ምሉክ መሰር ዲብ አልሀት ለቀየራቶም። ሕናመ ሸንሀትን መሰሉ ለአለቡ ሚርሓይ እግል ንክለቅ ምንካቱ።

ተመህ ቀደር



ደደፍ ለገጹ ሰኒ ባርህ እትእንቱ ወተበሰም እት ወዴ ክምእለ ቤለ።

- ናፈ - እንተ አክል አሕድ ክም እምዬ እንተ። ህተ ዶል ለኦተ ቀደሚህ እበጥርተ ደለ ገረመየ ወሐሰየ ሰፋት ኬር ኩለን እግልዬ ተሀይበን ወትተምነየን።

ናፈ እለ ክም ሰምዐ እብ ክርን ውቅልት ትሰሐቅ ወምን ሰሓቅ በጢር አቤ። ወምን ክትርለ ሰሓቅ ለገርቡ ሀለብእ ገብኦ ወለዕንታቱመ እብ አናብዕ ትጀቃጀቀ።

ደደፍ ህይ ሰኒ ፍኩር እቱ እት እንቱ ትሰኦለዩ።

- ሃልካቱ? አፎ ክም እሊ ትሰሐቅክ?

ለመንደላይ አስክ እለ ምን ሰሓቅ እንዴ ኢበጥር ክም እለ በልሰ ዲቡ።

- ተኦትሰሕቀኒ ለህሌት እንተ ምስል እምከ ሰበት አትመሳሰልከኒቱ።

- ከዲብ እሊ ለለኦትሰሕቀክ ለሀለ ጋር እሰውቱ? አነ እግል ኢበለ ለሐዘኑ።

- ደሐን ቱ እንታዲ። አዜ እግል ተኦትገር አው እዩ እግል ተኦቶህም እንዴ ትቤ ኢትትዐብ ወብዙሕ ኢትትሻቀል። እግል ቲበለ ተሐዘ ለህሌከ ሰኒ ፍህመ ህሌኩ። ምናተ ለጋሪት አነ ዮም እግል ሳልሳይ ዶልዬቱ እሲት ክም እመሰል እሰምዕ እት ለህሌኩ። አቡዬ አምዕል ሐቱ “እንተ ክም ወለት አንሳይት አዲግ ብልሰ - ብልሰ ትብል” ቤሌኒ። ላመ ካህን ሸልበ ቀደም ሳዐት። እብ ክሰሰ ሐቱ ሱረት እተ ከሆደግ እቱ ለዐልነ እዋን። “መንባዬ ናፈ፡ እንተ ለረሕመትከ ወለ ቀልብከ እምበል ወለት አንሳይት አሮትመ ኢትመሰል” ቤሌኒ። ወእንታመ እለ እንተ አዜ እምከ ክም እመሰል ትደግም እዬ ህሌከ! ከአዜ ሚ መሰለክ እለ አነ እሲት አነ ሚ እናስ?

ደደፍመ እብ አንክሩ እንዴ ትሰሐቅ ክም እለ ቤለ።

- ናፈ እንተ እናስ ሌጠ እንተ። ምናተ ሰኒ ረሐም ወበዐል ሽዑር ዛይድ እንተ። ሐቱ ዶል ሽኔ ለቤለ ትፈቅደ። ፈናኔን ፍንጌ አንሰ ወሰብ ተብዕን ለሀለው ጅንሰ አዳም ቶም።

ናፈ ክም እለ ቤለ።

- ሽኔ አሮት ነፈር ፈናን እግል ልግበእ ላዝም ናይ እኩሰት ሽዑር እግል ለህሌ እሉ ለኦትሐዝዩ መሰሉ ሀለ። ምናተ አነ ረሕመትለ ሕርመት ወረሕመት ፈናን ክልኤ ቅብላት አድሕድ ወአሕድ ለዳድየ ሐቃይቅ መሰለ ዲብዬ። እሊ ህይ እሲት እብ ጠቢዐተ ክልዶል በዐል መሰለሐት ሰበት ተዳይመን እለ መሰለሐተ ለትሐቅቅ እበ ገበይ ተ ለትታሌ። ወፈናን ህይ ሀደፋ ሸከረትለ ሓጃት እለ ፈትሽ ወጠምጠመ ወለዘተ ለኦዳውር፡ ግርመት ህይ እላተ። እሊ ህይ ግርመት እግል ሐቱ ሓጃት ክመ ህሌተ እብ ክል ዛተ ወስፈተ እንዴ አዳወርካህ ምስለ ብዕዳት መክሉቃት ለተኦትማሳ፤ ወለተሓብር እበ ገበይ ተ።

ደደፍ እንዴ ትሰሐቅ ክም እለ ቤለ።

- እንተ አዜ እብል ፈልሰፈትክ እለ እናስ ክም እንተ ተኦተአምነኒ ህሌክ መሰለክ ሀለ?

ናፈ አስክ እለ እግል ልትፋረዱ ዱሉይ ክም ሀለ ለተሐብር እቅማተት እንዴ አቅመተዩ ክም እለ ቤለ።

- አስክ እለ ደሊል እለ ህግያዩ ለለኦክድ እከ ትታኬ ህሌክ መሰለኒ? በል አነ እግል ህዳይ ዱሉይ ክም ህሌኮ እግል እበሸረከ።

ገጽ ደደፍ አሻይር ዐጀብ ዲብ ብዴቡ ትሰኦለዩ።

- እለ እለ ትብል ህሌክ አማን ካተ?

እግል መደት እብ ሰሓቅ ፈረሸክ ሐቆ ገበኦ ክም እለ ቤለ።

- እለ ምን ገብኦ እንተ ዐደድ እብ ህዳይ ለኢተአምን እተ ደረጀት ባጽሕ ዐልክ በለኒ?

- ኢፋልዬ ናፈ፡ ምናተ እንተ ህዳይ እት ተኦቤ ዲብነ አቡነ እብ ቀሀር ልትቀሌ ክም ዐለ አምር።

ናፈ ለእዲሁ እተ አፍ ልቡ ጸብጠየ ወአማን ልትሃጌ ክም ሀለ ምነ አሻይርለ ገጹ ልትአመር ዐለ ክክም እለ ቤለ።

- ደደፍ አነ ፈቱኩ፡ አመት አለቡ ሻም ጸብጤኒ!

ደደፍ ተማም ልቡ እንዴ ከረ እሉ ሻፍግ እት እንቱ ትሰኦለዩ።

- አመት አለቡ ሻም ትቤ?!

እብ እሕትራም ዛይድ ስም “ኤዚስ” ነቅም እት ሀለ ዲብ መሰል ክም እለ ቤለ።

- ማተ ወለት ካማዲ ለዲብ ወዛረት ማልየት ሸቄ ተ፤

- ከአዜ ሚ እግል ትውዴ ቱ?

- እግል ህደያ ቱ፤

ደደፍ እብ ክርን ሐልማይ ክም እለ ቤለ።

- እላቱ፡ ለእሙር እለ ምን ገብኦ እብ ክምሰል እለ ለትመሰል ገበይ ተ ለትትበደል።

- ለሸፋግ ምን እለ ወለዐል ዐለት። ከግድም ለልብ ኮናት ሐቆ አድመዐቱ፤ ለሰፊራይ ኖሱመ ሚ ወዲ ለአውድ፤

አማንተ ሻም ዐቢ ጋር ቱ። ደደፍ ፈን ደርሰ ወለባበት አመረ ወሰይፍ ጸረ። ሻም ላቱ ሐዳስ ሐካኪቶ ቱ። ከአፎ ሐካኪቶ ኢገብኦ። ሐካኪቶ ሰበት ገብኦ ቱ ኢኮን ለብሻውሮ እት ቀበት ሰኒን ለትሐለለ ምኑ ጋር እት ቀበት ሐቱ ሳዐት ለበደለዩ! እብሊ ሰብ ቱ ለሽዑሩ ዲብ ፈልሕ ወባሉ ዲብ ተውህ ለመጸ።



ዐውቱ ወለት ሰእየት ተ!

ክራም ናይ ቀወርዐት አሕድ እንዴ ጸብጠ ልትመሽ ዐለ። አመተ አለቡ ክልኤ ቆርዕ ዲብ ሕፍረት ሰኒ ቁሪት ወድቀዩ። ለብዕዳት እለን ክልኤ እግል ልፍገረ ክም ኢቀድረ ሰእየት ክም በትከየ ክም እለ ቤለያህን። ግምሽ ኢትትዐበ በታተን እግል ትፍገረ ክም ኢትቀድረ አምረ። ግድም በጽሐተክን እግል ገብኦት ሰብር ውደየ ወሞትክን ታከዩ። ለሐቱህን እብላህ እብ ድንጋጽ ሞተት። ለሐቱዲ ትትናፈር ወምን ቁሪት ሕፍረት እግል ትፍገር እብ ክለ ሐለተ ተኦትናጥጥ ዐለት። ለብዕዳት ህይ እግልሚ ግምሽ ተሀልኪ ህሌኪ? ፍግረት ላቱ ጸቤረ፡ መለክ ሞት ግድም ዓይርኪ ሀለ እብ ሰብር ወኤማን ትከቤ ቱ እት ልብላሃ እትለ ረኦሰለ ሕፍረት እንዴ ትባጠረየ ለኦተቃብላሃ ዐለዩ። ምናተ ህተ ላቱ እምበል ሕላሌ ትጅህድ እንዴ ዐለት እት ደንጎበ ተዐወተት ወመጭ እብ ፍግረት ትቤ። እብ ከፎ ፈገርኪ እት ልብለ ዶል ትሰኦለያህ። እለ ኢኮን ጽምት ወልግምት ክምተ አመረዩ። ከህተን ሰእየት ለለኦበትክ ሀገጊት እት ልትሃገያህ ትሰምዐን ሰበት ይዐለት እተ ረኦሰለ ሕፍረት ልትባጠረ ምን ርኤተን ሸጅዓህ ወለኦትናይታህ ለህለየ መሰል እተ ዐለ። ወእብሊ ሰብ እምበል ሕላሌ ወበቲክ ሰእየት ሰበት ጃሀዘት እት ደንጎበ ተዐወተት ወምን አከይ ሞት ደሐነት። “ሀገጊት አዳም እዘን ኢተሀቡ፡ ልብክ እተ ጋሪትክ ሌጠ ክረዩ ወገጽከ ቀደም አቅምት”።



ነፈሰ ወድ ዕትማን

ሸሃደት ዕጩት

ዲብ ሐቲ ዐድ መንሱር ወተውሳክ ለልትብሀሉ ክልኦት መሳኒት ነብሮ ዐለው። እሱም ክልኦት መሳኒት እንሰ ለአውዕሎ ነብረው። ተውሳክ እንሳሁ ሰኒ ብዝሐት ዐለት። እንሰ መንሱር ላተ ሸብህ ነብረት። መንሱር ወተውሳክ ክሉ ረአሹ ፍኑቲያም ኢልኦምሮ። ምስል ሰብኩ ወምስል ሳግሞ። ለምሮቶም ታውረት ጌሰ ምን ገብእ ለካልኦይ ዲብ እንሰ ጸንሕ ዐለ።

ምናተ ምስል እንዴ ነብሮ ጠቢባቶም ሐቲ ይዐለት ። መንሱር ላብብ ወ በዐል ዕሽረት እት ገብእ ተውሳክ ዲብ ማል ጸሩ ለልትገህፍ ወገህ ዐለ። ምናተ እግል መንሱር ሰኒ ፈትዩ ወለኦምኩ ዐለ። መንሱር ሐሊብ እንሳሁ እንዴ ለአዘቢ ዲብ አግሩሽ ወድዩ። ለአግሩሽ ህዩ ዲብ ደህብ ቀይረ ዐለ። ተውሳክ ምን እንሳሁ ክሉ ረአሱ ኢልኦምሮ። ዝቤ ሐሊብ ወረአሰ ክም ሰርዕ ገንሐ። ዲብ እለ ጋሪት እለ ለትበኣሶ ዐለው። ተውሳክ “ሕኔት እት ክል-ሰነት ዝቤ ህምራራብ ያረይ ምን እድንዮ ትራራብ ግብኣት ተሐይሰ” እት ልብል ለኣትሳቅር ወእንሳሁ ሰናቄ። መንሱር ላኪን ምን ግሩሽ ሰኒ ለብሱ ልትጋሬ። በልዕ ወሰቲ። ተውሳክ ዐድድ ለዝቤህ ንዋይ ለኣብዩ። ልትጋሬ። ወለብሰ ኢነብረ። እት ሰነት ሐቲ ዶል ለብሰ ምን ገብእ ቀፍደት ዲብ እንቲ ነብር። ለእንሰ ሕኔት ለአዘብዩ ዕሩቅ ወትጉይ ዲብ እንቲ እግል ልዕፈዮ ለሐዘ።

ተውሳክ እንሰ ዲብ ሰናቅዩ ወክላክበ ለዐፍዮ ሌጠ ነብረ። ኢህደ ምን ወኣትለውቀ። እንሳሁ አክለ ሀነት ገልበበት። መንሱር ላኪን እክለ በዝሐት በዝሐት እንዴ አዘ እት ረትዕ ምን ዐደድ ቅድረቲ ክምስል ትገብእ ወደዩ። እሱቲ። ውላዱ ወዋልዲት ራዴ ወለአለብሰ።

መደት ሐቲ መንሱር ምን እንሳሁ ክልኦት ገመል እንዴ አዝበ ሐጅ እግል ሊጌሰ ሰተተ። ሸሙይ ክምስል ትዳሉ። ዲብ መልህዩ ተውሳክ እንዴ መጽኡ። “መልህይ ኣነ ዮም ዓመት ሐጅ እግል ኢጌሰቲ። እንተ በዐል አማነቺ ሰበት እንተ ደህብ ህለ እግልዬ ምስልክ እብ አማነት እግል ሕደጉ ቲ። ምን አመረ ሞት ህሌት ወሐዮት። ኣነ ሐቆ ደኣቅበልኩ እግል ዋልደይ ሀቡ። እብ




ዓዳትን ነኣምር

ነፈሰ ወድ ዕትማን ወኢኖ ሊትማን እብ ክሱስ ሐልዮት፡ ዓዳት ወኢድጋ ትግራይት እተ ወደዉ በሐስ ወድራሳት፡ ክምስልሁ መ እት ደረጀት ሞባዐት ለኣብጸሐው፡ ከዮም ክብት ትግራይት እግል አጅያል ለሐዲስ ጋብእ ለህለ አክትብት፡ እግል መጽእ አጅያል መትሃግዮት ትግራይት ዝሕረት ዐባይ ቲ። ነፈሰ ወድ ዕትማን ወኢኖ ሊትማን ህዩ ዲብ ተእሪክ፡ ዓዳትን ወሕላይን ለአግደዉ ዶር እብ ቀሊል ለልትረኡ ኢኮን። ከሰፍሐት ፈን ወግዳት እለ እት አክትብት በዲር ለህለ ርዝቅ ህግያን ክሉ አዳም ጀላብ እግል ልርክቡ፡ ለኣምሩ ወልትነፈሰ እቡ፡ እትሊ ዓሙድ እለ ምን ብዞሕ ጽበጥለ አክትብት ዲብ ነሐሬ እንቀድም እኩም ህሌን። ከእግል ዮም'መ ምን እለ አክትብት እለ ለኣዳሌናሁ ጽበጥ ጀበእ እምለኩም፡ ከቅራኣት በኪተት፡

ሰላመቼ ሐቆ መጸኣኮ ህዩ ምስልክ ልጽነሐኒ፡ ላመ እንሰ ምስልክ ትጽነሐኒ” እንዴ ቤለዩ ትሳረሐ ምን።

ተውሳክ “እንሻለ እብ ሰላመትክ ተአቀብለክ፡ ምሽክለት ይህሌት። እመን ወድመን፡ ምንዬ ቀርበክ ወሰኔ ዲብክ አለቡ”እት ልብል እብ ፈርሐት ከበተዩ ምን።

መንሱር እንዴ ትዳለ አሰክ ሐጅ ትበገሰ። እንዴ ሐጅጅ ክምስል አቅበሉ፡ ማያት ዘምዘም እንዴ ነስኦ ዲብ መለህዩ ክማም ገብኦ። ተውሳክ ምን ማይ ዘምዘም እንዴ ትሻመተ እግል መልህዩ ሐሊብ ሐልብ እግሉ። ሐሊቦም ክምስል ሰተው ወግረፈው። መንሱር ደህቡ እግል ልንሳእ ትሰኣለዩ። ተውሳክ ክምስል ሐቲ ኢልኦምሮ፡ “ኣነ ደህብ ሃይብዬ ይእንተ፡ ትተልጃ ህሌክ፡ ሚ አማንካቲ ብዕድ ሃይቡ ኢትግባእ!” እት ልብል



ሰኣል ቀደመ። “እት ፍንጌን እምበል ረቢ ምርት ይዐለ። እብ በይን እት ሐንቲ ዕጩት እንዴ ትገሰኒ እብ አማነት ሀብክዉተ። ዮም ጠልሚኒ ዲብ ኢኮን፡ ምን ነኣሌሌ ምስል ዓብደም ሕን። እሰክ አዜ መሳኒት ወመታሊት ዐል።” ለአማን እንዴ ኢልሐብዕ በርበረዩ።



ጠልመዩ። መንሱር ሰኒ ድንገጽ። ምን ለልኦምኩ ወፈትዩ መለህዩ ለኢትጸበረዩ መሻክል ሳደፈዩ። “ተውሳክ፡ ረቢ ፍረህ፡ ወነቢ ትክለብ፡ ኣነ ምን ዐጂ፡ ወእሰቼ እግልክ አመነኩ። እለ ከፎ ትወድዮ። ምስል ዐቤ፡ ምስል እኪት ወሰኔት ርኡን። አዜ ዲብ ሐዋኒት ኢንትበኣሱ። እለ ደህብዬ ሴመ ኢወሰክ እግልክ” እት ልብል እግል ለኣፍህሙ ጀረቤ።

ተውሳክ እንዴ ልተርጀግ “እንሳክ እብ ለህ ምንዲ አውዐልኩ እግልክ አዜ ሕኔት በዐል ፈክዬ እንዴ ትቤ ሰኔት ትፈዳኒ። ሰረቅከኒ ትብላኒ። አፋክ ጽበጥ፡ እለ ህግዩ እለ ሐቆ ደገምካህ ረቢ እመን እብለ ሞረ ጠነብብ እግል እውዴክ” እት ልብል አትፋርህዩ። መንሱር እብ ቅሩቱ እግል ለኣፍህሙ ጀረቤ። ተውሳክ ላኪን እት ፍንጌህም ሸሁድ ሰበት ይዐለ ትበረዩ። መንሱር ብትክት ክምስል ደሉ፡ እት ቃዲ ሸከዩ። ለክልኦት ፈተች እት ቀደም ቃዲ በሞረው። መንሱር ሰኒ እሱፍ ዲብ እንቲ ሸክወቱ አሰመዕ። ተዋውክ ላኪን ርኢ ዶኣነ ወሳምዕ እት ልብል ነክረ።

ቃዲ ቴለሎም እግል ልሕፈገዩ፡ “እንተ መንሱር ተህይዑቲ እት ህሊክ እት ፍንጌኩም ሻሁድ ዐለ ሚ ኢኮን?”



ኢኖ ሊትማን


ዶል ቤሉ፡ ተውሳክ ፋርሕ ዲብ እንቲ፡ “ኣይወ ተኣከረ ለቀድዮት አፎ ዕድም ሓር ኢትወዱ እግለ?” እት ልብል ጠልቤ። ለቃዲ ረኣይ ተውሳክ ለትክበተ እት መሰል፡ “ስምዒ ለዕጩት አክል-አዩ ረይም ህሌት? አጊድ ለአቀብል ሐቆ ኢገብኦ፡ ለፍርድ አምዕል ሐሪት እግል ንውደዩ እንቀድር” ትሰእለዩ። ተውሳክ እንዴ ኢፈጥን “በው! ለዕጩት ለህ አሰክ በጽሕ ዩም ኢህለ። አምዕል ታመት ትነሰእ ምን” እት ልብል በልሰ። ለቃዲ እንዴ ልትሰሐቅ “እንተ ርኢ ዶኣነ ወሳምዕ ትብል ይዐልክ? ምስሉ ምንዲ ኢትዐሌ ለዕጩት ከአፎ ወኣመርካህ?” እንዴ ቤሉ “መንሱር!” እት ልብል ትሳክ። መኣንሱር ምን በረ እምበል ዕጩት ምጽኡ። ምን በዲሩ ዕጩት ጋደሰ ይዐለ። እሰክ ለጋሪት ተምም ልትጸበር ጸንሐ።

ለቃዲ እንዴ ልሐማሕም “ተማም ቢጋእ፡ እንተ ተውሳክ ዲብ አርወሐትክ ኖሰክ ሰበት ሸህድክ፡ ለደህብ ኖሰኡ እንተ። አዜ ህግዩክ እንዴ ኢትኣበዝሕ መንሱር አጊድ ለደህቡ ሀቡ” እት ልብል ፍርዱ አትመመ። ተውሳክ እለ ወዴ ሰበት ትቀዌት እቲ እንዴ ኢፈቲ ለፍርድ ትክበተ። ለደህብ ህዩ ምስሉ ክምስል ህለ አምን። እብ ፍርድ ራትዕ መንሱር ደህቡ ረክበ።

ምን ሕላይ ቀዳምያም

ምን ሐልዮት መንሰዕ ቤት አብረሄ ዩሐንስ ወድ ጀጊን እግል ጀሃድ ወድ ዐገብ ለበከዩ ዐቤ እግል መምባከ ሕነ ዲቡ እነዓድል ሓጥጥ ገደቦ ቲ ኢለትኣድሰ ወኢባድል ህቲ ዐለ ገለቡ እለ አዳም ለለሳቅር ለቃትል እብ ደሙ ሐቅፈዩ ሰኒ ሓጥጥ ቲ ወዛግን እርደት ጋልዕቲ እብ በፍተ ዊሻ ለረኣሰ መን ፋግር ግሳሰ ዐድ ከፈር በለ ም ዐማር ወድ ናሰር ብይኣት እማታ ተ አሰሮ ዲብ መጸምር ወለት ዝላም ተ እት ሼክ ወቅንጤጠፈት እት መዋቅል ቀዩሕተ ገለብ ዐገብ ለእለ ካውሎ ምን መሓክር ቀዩሕተ ግምቦ ማሼለ ሐረሰታዩ ከላክል አቡከ ሐቆ ፍንቲተ ድኩል ኢኮን ከቃብል





ዱር ፈረንሳ 2023፡ እት ዓሰር መርሐለቱ



ሚክኤል ወድሰ፡ ዕውት ዓይነት መርሐለት



ቢንያም ግርማይ አሮ ዕን አፍሪቃ ዲብ ዱር ፈረንሳ 2023

የም 1 ጁላይ ምን መዲነት ቢልባው ስፕይን ለአንበተ ዱር ፈረንሳ 2023፡ ታሰዓይት መርሐለቱ እንዴ አትመመ እት ዓሰር ልትዐዴ ሀለ።

እሊ ዝያድ 185 መትባድረት ዐጀላት ለብእቱ ዱር ፈረንሳ 2000 ማይል መሳፈት ለሸምል ቱ። መላዩን አዳም ህዩ ክል ሐል ለዐፍዩ።

ሰለስ መርሐለቱ ዲብ ፈጊር ሰጋይድ ላተን ዱር ፈረንሳ ዎርት ምን ለትደቀብ ብድረ ዐጀላት ዐለም ቱ። ምን 23 ምዕል ናት ጅግረ ህዩ ክልኤ ምዕል ሌጠ ለዓርፎ።

ኩለ ለትልህዩ ዲብ ለሻርክ መትባድረቱ ዐጀላት 118 አልፍ ካሎሪ ጣቀት ለአበዴ። እት ክል ምዕል 26 ቼቡሌት ዐባዩ በሌዕ ሀለ በሀለት ቱ።

ተርጀመትለ አክደር ጸዐደ ወቀዩሕ፡ ክምሰልሁመ ቤጪ ፍሌንያት ህዩ ሚ ቱ ገብእ?

ፍሌንያት አክደር እግል ለበዝሐ ንቀጥ ለአከእለለ መትባድራይ ትትህዩብ። ቀዩሕ ወጸዕድ ሕልዊት ፍሌንያት እግል ለነእሽ መትባድራይ፡ ወለቤጪ ፍሌንያት እት ክል መርሐለት ለሐሰ ሚርሓይ ወመትምማይ መርሐለት እግሉ ትትህዩብ።

ዱር ፈረንሳ ምን አንበተዩ ትብሉ?

ዐጃይብ ቱ! ዎርት እት ጀሪደት ‘ለአውቶ’ ሸቄ ለዐለ ሰሕፊ፡ ለጀሪደቶም ሰኔ ጀላብ እግል ትትዘቤ ፍክረት ጅግረ ዐጀላት እግል ሊደው ዲብ ሐሰብ። ህቱ ሄንሪ ዴሰግራንጅ ልትበህል ወዲብ ሰነት 1903 ቱ እለ ፍክረት ለአምጸአ።

እት ሳልሳይት፡ ራብዓይት ወሳብዓይት መርሐለት ናይለ ጅግረ ጃስፐር ፊሊፕሰን ሰበት ተዐወተ እብ ለበዝሐ ንቀጥ መሬሕ ሀለ።

እት 5ይት መርሐለት ጃይ

ሂንድላይ፡ እት 6ይት መርሐለት ታጅ ፓጋካር፡ እት 7ይት መርሐለት ጃስፐር ፊሊፕሰን፡ እት 8ይት መርሐለት ማድሰ ፔደርሰን ወዲብ 9ይት መርሐለት ሚክኤል ወድሰ ዕውታም ህለው።

እት ዱር ፈረንሳ 2023 ሻርክ ለህለ ኤርትራ ቢንያም ግርማይ የም ዓመት ምን አፍሪቃዩን መትባድረት ዐጀላት ዎር ህቱ እት ገብእ፡ እት ሳብዓይት መርሐለት 3ይ፡ እት ሳልሳይት መርሐለት 11ይ፡ እት ራብዓይት መርሐለት 19ይ፡ ወዲብ 8ይ ደረጃት 44ይ ፈግር እት ሀለ፡ ምን ብዝሓም ፈተች ዐጀላት ዐጀብ ራክብ ለህለ አፍሪቄ ቱ። ቢንያም ቅሩብ ዐውቱ ዲብ እንቱ እት አክር ደቃይቅ፡ ሳልሳይ ለፈግረ ዲብ ጅግረ ሳብዓይት መርሐለት፡ ደሩክ ምን ብዝሓም ከወጅ ክም ሳደራዩ ዔማታት አክባር አከደ።



እት ሸቅል ሕበር ምስል ውላድ ፈሪቅክ

ሻምፕዮን ኮበሪት ሰለት ልተላሌ

ሻምፕዮን ፍረቅ ኩረት ሰለት አወላይ፡ ካልኣይ ወሳልሳይ ዲቪዝዮን አቅሊም ምግብ፡ ለሐልፈ ሰነብት ብዝሓም ፈተች ባሰኬት-ቦል እት ሐድረወ መናሰበት እት ሚዳን ቦቺፊለ አሰመረ ትሉሉይ ክም አሰንበቱ፡ ዕላቃት ዓም ፈደሬሽን ኮበሪት ሰለት አቅሊም ምግብ ሐበረ።

ሰንበት ንኢሽ አሰቦሕ ለተልሀው ፍረቅ ሳልሳይ ዲቪዝዮን ማሪት ወአሰር ቶም። ማሪት ህዩ እብ 20 ንቅጠት እንዴ ዜደ 59ኡብ39 ተዐወተ። ሐቆሆም ለተልሀው ኮከብ ወአማዘን እት ገብእ፡ ፈሪቅ ኮከብ እብ ፋዴሕ 61ኡብ13 ክም ተዐወተ ተአመረ። እምበል እሊመ፡

ተሰፋ እግል ዊነርስ 38ኡብ34፡ ኤኤስኤም-4 እግል ኤኤስኤም-3 ህዩ፡ 27ኡብ26 ቀልበም።

ሰንበት ዐባይ እት አተላላ ትልህያታት፡ ምን ፍረቅ ሳልሳይ ዲቪዝዮን ኤኤስኤም-1 እግል ዕዳጋ ሐመሰ 43ኡብ34 እት ቀሉቡ፡ ምን ፍረቅ ካልኣይ

ዲቪዝዮን ህዩ፡ ዕዳጋ ሐመሰ እግል አሰር 45ኡብ38 ሳርሐዩ። ሐቆሆም ለብዝሓም ፈተች ባሰኬት-ቦል ልታከወ ለዐለው ትልህዩ እት ፍንጌ ፍረቅ አወላይ ዲቪዝዮን ሲቲሰንተር ወዐንበርብ ገብእት።

እትለ መጃገረት ሰኔት ለትረኤት ዲብ ትልህዩ፡ ፈሪቅ ዐንበርብ ቱ

እግል ፈሪቅ ሲቲ ሰንተር 50ኡብ44 ለቀልብ። እትለ ትልህዩ መተልህዩት ዐንበርብ ናኣድ ጸሃዩ ወሀይሌ ኢሳቅ እት ሰርገል ፈሪቅም እብ አርአወ ትልህዩ-ግርም፡ ሐምዴ መትፈርጀት ረክበው።

መተልህዩት ሲቲ-ሰንተር አቤል የውሀንስ ወሰምኣን ተከሰቱ፡ ፈሪቅም ምንመ ኢቀልብ፡ እብ ለአርአወ ትልህዩ ዋቅያም መተልህዩት ትበሀለው።

ሐቆሆም ለተልሀው፡ ፍረቅ ሳዋ ወሓሬና ቶም። እሎም ክልኣት ፈሪቅመ ትልህዩ ግርም አርአው። መተልህዩይ ፈሪቅ ሓሬና ናሆም ተከኤ (አርባዓ) ምን መሳፈት 22 ምትር ናይለ ሚዳን ለአተዩን ሰለስ ንቅጠት ታሪክ ፍንቱይ ሰጁል እበን ሀለ።

ትልህዩ እብ ሰበብ ዝላም ድቅብት ምንመ አትካረመት፡ እት መጽእ ወክድ ምን ክልኢቱ ፍረቅ ሳዝም ለቀልብ እግል ልትአመር ሰበት ቡ፡ ለትልህዩ እትለን ለተልዩ አምዓላት ቅሩብ ሕሉልፍት ሀሌት።



ምን ቅያስ ወለዐል ምክር ኣክቦት ናይ ቀራር መቅደረት ለኣነቅስ!

እት ሄራር ሓያት እት ትትጋሚ ወዲብ ትሰዳዴ እግል ትንበር ለሐሰ ፍገራት መንበረት እግል ተሀሌ እግልከ ሰዴ። ምናተ ቅያስ ለሐልፈ ምክር ንስኣት ምን መንፈዐቱ መደረቱ ክም ዘይድ ስዊዘርላንድዩን ባሕሲን ሸርሐ።

ለባሕሲን ጃምዐት ጃኔሽ ስዊዘርላንድ፡ ዎሮት ነፈር ምን ለትፈናተ ዔማት፡ ምነ ለለትሐዝዩ ወለዐል ምክር ለልትከበት ገብኣ ምንገብኣ፡ ናይ ቀራር መቅደረቱ ክም ልደሀር ለሐብሮ። ህዩም ኡዳም እብ ሰበት ዎሮ ጋር ለሐድድ እት ህለ ሰልፍ እበ እት ቀብቱ ለልሸዐር እቡ ሸዑር እንዴ ሰደ ክም ቀርርቱ ለልኣምና። ረታዐት ናይለ እት ነፍሱ ለህለ ሸዑር እግል ኣከዶት ህዩ ምን ከደን ምነ ህለ ብዕድ ነፈር ምክር ልታኬ ልብሎ።

ምን እሊ እንዴ ትበገሰ ህዩ “ምን ብዕዳም ለልትከበቶ ምክር ወለ ዲብ ቀራር እት ንስኣት ለሰድዩ እትጃህ ለለጸብዋ ልግበኣ፡ በዝሕ እት ህለ ላኪን ናይ ቀራር መቅደረትን ወስቀት ዲብ ነፍሱን እት ለትደሀረት ደረጃትቱ ለከሬ ወዲብ ሸኩክ ሸመከ” እት ልብሎ መክረው።

ለቀለ ቀራራት ናይ ሓያት ሚ ልባስ እንሉብስ፡ ኣስክ ኣይ መዋዐም እንገይስ ውብዕድ እሉ ለመስል ቀራራት እበ ዲብ ነፍሱን ለእንሸዕር እቡ ምራድ እንዴ ተሌን እግል ንቀርሩ ለእንቀድር ቀሊል ጋርቱ። ለዐባይ ቀራራት ናይ ሓያትን ላኪን፡ እበ ዲብ ሄራርን እግል ልንፍዑን ለእንሰምሕ እሎም ጌምየትን እትጃህ ለጸብዋ ሰበትቱ እግል ንትሓፈዝ ወጅብ። ለምክር

ወሐብሬ ዶል በዝሕ ህዩ፡ ፍንጌ-ፍንጌ እግል ንትረፍ ክም ቀድር እንዴ ፈሀምን እንትባህነ እግል ልዕቤ ክምቡ ሮበርት ዩርክ ለለትበህል ዎሮ ምነ ባሕሲን ወደሕ።

ምን ኡዳም ልግበኣ ወወላእል ለእንረክቡ ምክር ወሐብሬ እግል ልብዘሕ ክም ኣለቡ እት ለኣሸሮ ለበሕሲን ለእንረክቡ ምክር ወጎማት ህዩ ዲብ ሓያትን እብ ወጅብ ለእንራቅቡ ወለ ንትነፈዕ እቡ እግል ልግበኣ ክምቡ ሐበረው። እብ ፍንቱይ እትሊ ለህሌን ዲቡ ዋውር ናይ ተክኖሎጂ ወክድ፡ ኢንተርኔት ኣፕሊኬሽናት እንዴ ትነፈዕን ለእንረክቡ ሐብሬ ከዋ ፈሀምን እግል ኢልሰረቅ ለባሕሲን ዲብ ደንገበ እንዴ ኣተረደው ልትፋነው።

ሓቃይቅ እብ ሰበት ሰሓቅ

ኡዳም እብ መጅሙዐት እንዴ ገብኣ ለትሰሓቅ እቱ ወክድ፡ ክል ነፈር ዲበ ቅሩቡ ለህለ እንዴ ትወለበ ልትሰሓቅ።

ሰሓቅ እግል ዓፍየት ወጅህን ሰኒ ምህምቱ። እግልሚ ዲብ ወጅህን እግል ለህለ ገሌ ኣስራር ክም ልትሐረክ ሰበት ወድዩ። እተ ለንሰሓቅ ዲቡ ወክድ 26 ኣስራር ወጅህን ልሐረክ።

እግል 15 ደቂቀት መትሰሓቅ 40 ካሎሪ ነስታህልክ።

ሰሓቅ ደቅዋ ዲብ ኣንቀሶት ዶር ዐቢ ለኣገዴ።

ኣግሩዝ ሰለስ ዕጽፍ ናይ ካምል ነፈር ልትሰሓቅ። ኣዋልድ ኣንሳት ህዩ ዝያድ ምን ውላድ ወለዓል ልትሰሓቅ።

ኖስ -ኖሶም እት ልትሰሓቅ ወገጽ ባርህ ዲብ ለርኡ ለልትሃጀት ጼወ ትርድት ዕላቀት መልኩ። እብ ሕበር ህዩ እግል ረያም መደት እግል ልንበሮ ለህለ ኣብካቶም ለዐቤ።

ተበሰም ውድየት በሊስ ሰኒ እግል ተርኡ ለኣቀድረክ። ድራሳት ክመ ለሐብሩ፡ ምነ ናይ ኣማን ግርመት ለመልኮ ወለዐል ተበሰም ለወዱ ኣንፋር ዝያድ ጀዛቤን እንዴ ገብኣው ልትረኣው።

እብ ሰበት መሳኒት ሚ ተኣምሮ?



ዎሮት ነፈር እት መደት ሓያቱ ብዝሓም መሳኒት ልታሌ። ለበዝሐ ወክድ ላኪን ምስል ዎሮት ነፈር ሌጣቱ እግል ረዩም ወክድ ለተኣተላሌ መስንዮት ለወዴ።

መሳኒት ኣው ፈተች ኢመታላይ ዲብ ዓፍየትክ መደረት ለኣመጽኣ። መሳኒት ኣው ፈተች መታላይ

ህዩ መሻክል ለኣነቅስ። ፈዳብያም ኣንፋር ምን ብዕዳም ኣንፋር ወለዐል ሓዳም መሳኒት ልታለው። ናይ እሊ ሰቡብ ህዩ ዲብ ሕርየት መሳኒት ሰኒ ወኣማን ድጉጋም ሰበት ቶም።


ናይ ቅሩብ መሳኒትክ ዲብ ኣግቡይ መነትክ ነብራክ ታእሲር



ቦም። እግልሚ ናይ ቅሩብ መሳኒትክ ግሩም ጽቡት ለበ ነብረ ልትመወኖ ገብኣው ምንገብኣ፡ እንታመ ግሩም ትበልዕ። ዲብ ኣግቡይ መነቶም ለኢለኣህተምም ገብኣው ምንገብኣ ላኪን ክምሰልሆም ትገብኣ።

እብ ኣሳስ ለገኣ ድራሳት ዲብ ዕምር ብጽሑን ለበጽሐው ኣንፋር፡ ዎሮ ኣው ክልኣት ሌጠ ናይ ቅሩብ መሳኒት ወዴ።

ሸዑርክ እብ መሳኒትክ ታእሲር እግል ለህሌ እሉ ለህለ በክት ብዙሕ ቱ። ክም መሰል ዲብ ድዋርክ ለህለው መሳኒትክ ሓቅ ሐዝዝው እንታመ ተሐዝን። ፈርሓኒን ሓቅ ገብኣው ህዩ ፈርሓን ትገብኣ።



ሳድስ ወራር እብ ካርቱ?

ዎም 15 ወርሕ 2 ሰነዝ 1982 ራድዎ እግብያ ለ' ንግዳ ባዳሪት' ጅምብትት ጅም ህሌት ጅብ ፋፕት ፕሮካ።

እትላ እምዕዕ ደን ህቶ እት ሓፍ ጸነት ወጅብ ከላ ጅብህት፡ ሳጅግል ፎትድ ሰውረት ጸርታይዎ ጅት ቀብት 3 ወርሕ እግል ገንብጻ ቱ "እትላ" ህገ ሓርገ ንጓብተ ።